



登記號 009823

類號

類別 子部類書類

全書 函一册

永樂大典卷之一萬四百二十一 四濟

李

李彭年

相州志李彭年字元老郡人也紹興八年舉進士第調銅陵尉初戚方入境父母沒于賊兵彭年追慕不已郡守洪

興祖嘗表稱之曰伏見止居官李彭年言行有常鄉里稱孝昨者賊兵入境作過彭年二親相繼被害冒犯白刃收歛營葬追慕哀慟人不忍聞除喪累年疏食水飲誓終此身不食酒肉語及其親慟泣下自兵戈以來習熟見聞孝養廢闕不能如禮者多矣彭年獨躬行之出於至誠委有顯跡可以激厲風俗朝廷嘉之勅賜旌表門閭官至鎮江府教授今旌表猶在石燈山之舊居號其里曰旌孝

李中

元一李中紹興十五年知僊井監其子燾即

李燾

列傳李燾字仁甫眉州丹棱人唐宗室曹王之後也父中登第知僊井監燾甫上金辭忝報著反正議十四篇皆救時



大務紹興八年擢進士第調華陽簿再調雅州推官改秩知雙流縣仕族張氏子居喪而爭產燾曰若忍墜先訓乎盍歸思之三日復來遂悔其非訟又有不白其母而鬻產者燾寘之理豪強歛跡於是以餘暇力學燾耻讀王氏書獨博極載籍搜羅百氏慨然以史自任本朝典故尤悉力研覈做司馬光資治通鑑例斷自建隆迄于靖康為編年一書名曰長編浩大未畢仍效光體為百官公卿表史官以聞詔給札來上制置王剛中辟幹辦公事知榮州榮因溪為隍夏秋率苦水潦燾築防捍之除潼川府路轉運判官入境劾守令不職者四人縣多聚歛燾括一路財賦額通有無酌三年中數定為科約上之朝頌之州縣乾道三年召對首舉藝祖治身治家治官治吏典故以為恢復之法乞增置諫官許六察言事請練兵無增兵杜諸將私獻覈軍中虛籍除兵部員外郎兼禮部郎中會慶節上壽在郊禮散齋內議權作樂燾言漢唐祀天地散齋四日致齋三日建隆初郊亦然自崇寧大觀法周禮祭天地故前十日受誓戒今既合祭宜復漢唐及建隆舊制庶幾兩得詔垂拱上壽止樂正殿為北使權用正除禮部郎中言中興祭禮未備請以開寶通禮嘉祐因革禮政和新儀令太常寺參校同異修成祭法四年上續通鑑長編自建隆至治平凡一百八卷時乾

道新曆成。燾言曆不差不改。不驗不用。未差無以知其夫。未驗無以知其是。舊曆多差。不容不改。而新曆亦未有。大驗乞申飭曆官討論。五年遷祕書少監。兼權起居舍人。尋兼實錄院檢討官。子廔試賢良方正。直言極諫。科燾素謂唐三百年。不愧此科者。惟劉去華心慕之。嘗以所著通論五十篇。見蜀帥張燾。欲應詔不偶而止。其友晁公邁以書勉之。燾答以當修此學。必不從此舉。既不克躬試。於是命二子廔塾習焉。至是吏部尚書汪應辰薦。廔文行可應詔。故有是命。左相陳俊卿出知福州。右相虞允文任恢復事。更張舊典。宰相以燾數言事不樂。燾遂請去。除直顯謨閣。湖北轉運副使。陞辭以欲連變右為戒。又奏禹貢九州。荆田第八。賦乃在三。人功既修。遂超五等。今田多荒蕪。賦虧十八。上命之條畫。既至。奏京湖之民結茅而廬。築土而坊。庸牛而犁。糴種殖穀。苗未立。畔畹已多。有橫加科歛者。今宜寬侵冒之禁。依乾德詔書。止輸舊稅。廣收募之術。如咸平元豐故事。勸課有勞者。推恩詔從之。總餉呂游問入奏。燾攝其事。歲飢。發鄂州大軍倉賑之。僚屬爭執不可。燾曰。吾自任不以累諸君。尋如數償之。游問返。果劾燾專上止命。具析不之罪也。八年直寶文閣。帥潼川。兼知瀘州。首葺石門堡。以扼夷人。奏乞戒茶馬司。市叙州羈縻馬。毋溢額。戒官民毋於夷漢禁

山伐木造舟。奏移鎖水於開邊舊池。皆報可。淳熙改元。召適城中火。上章自劾。提刑何熙志奏。焚數不實。且言長編記魏王食肥彘語。涉誣謗。上曰。憲臣按奏火數。失實職也。何預國史。命成都提刑李繫究火事。詔熙志貶二秩。罷燾止貶一秩。燾及都門乞祠。除江西運副。且許臨遣。或勸以方被讒。無及時事。燾曰。聖主全度。如此。竭忠。所以為報。遂奏日食地震。皆陰盛。主敵國。小人不可不慮。且申無變古。無欲速。兩言。又上快箴。引太祖罷朝。悔乘快決事。以諫。上曰。朕當揭之座右。進祕閣。修撰。權同修國史。權實錄院同修撰。燾為左史時。嘗乞復行明堂禮。謂南郊明堂初無隆殺。合視園壇。特免出郊。浮費。至是申言之。詔集議。嬖幸沮止。其後周必大為禮部尚書。中其說。始克行權禮部侍郎。七月壬戌。雷震太祖柱壞。鷓尾。有司旋加脩繕。燾奏。非所以畏天變。當應以實上諭大臣。燾愛朕。屢進讜言。賜金紫。嘗請正太祖東向之位。四年。駕幸太學。以執經特轉一官。燾論兩學釋奠。從祀孔子。當升范仲淹。歐陽脩。司馬光。蘇軾。黜王安石父子。從祀武成王。當黜李勣。衆議不叶。止黜王雱而已。真拜侍郎。仍兼工部。徽宗實錄置院。已久。趣上奏篇。燾薦呂祖謙學識之明。召為祕書郎。兼檢討。官夜直。宣引奏。近者蒙氣蔽日。厥占不肖者祿。股肱耳目宜謹。厥與賜坐。欲起。又留賜。

飲賜茶。尋詔監視太史測驗天文。九月丁酉日當夜食。燾為社壇茶告官。伐鼓禮廢。特舉行。屋既中。制科為祕書省正字。尋遷著作郎兼國史實錄院編修檢討官。父子同主史事。搢紳榮之。燾感上知遇。論事益切。每集議。衆莫敢發言。獨條陳可否。無所避。近臣復舉其次子塾。應制科。以閣試不中。程黜。屋偶考上舍試。卷發策問。制科為御史所劾。語連及燾。屋罷。燾亦知常德府。初政。和未。澧辰沅靖四州置營田。刀擊手募人。開邊。范世雄等附會。擾民建矣。罷之。乾道間。有建請復置者。燾為轉運使。嘗奏不當。復已而提刑尹機迫郡縣行之。田不能給。燾至是。又申言之。請度田立額。且約帥臣張栻列奏。詔從之。境多茶園。異時禁切。商賈率至交兵。燾曰。官捕茶賊。豈禁茶商聽其自如。訖無警累。表乞開提舉興國宮。秋明堂大禮成。以其首議。復除敷文閣待制。頃之。屋塾繼亡。上欲以吏事紓燾。憂起。知遂寧府。七年。長編全書成。上之詔。歲祕閣。燾自謂此書寧失之繁。無失之略。故一祖八宗之事。凡九百七十八卷。卷第總目五卷。依熙寧修三經例。損益修換四千四百餘事。上謂其書無愧。司馬遷燾嘗舉漢石渠白虎故事。請上稱制臨決。又請冠序。上許之。竟不克就。又奏陛下即位二十餘年。志在富彊。而兵弱財匱。與教民七年。可以即戎者。異矣。一日召對延和殿。講臣

方讀陸贄奏議。燾函言贄雖相德宗。其實不遇。今遇陛下。可謂千載一時。遂舉贄所言。切於今。可舉而行者數十事。勸上力行之。上有功業不足之嘆。燾曰。功業見乎變通。人事既修。天應乃至。進敷文閣學士。提舉佑神觀。兼侍講。同修國史。薦尤袤。劉清之。十人為史官。十年七月。久旱。進祖宗避殿減膳。求言故事。上亟施行。丁丑。雨。一日宣對。燾言外議。陛下多服藥。罕御殿。宮嬪無時進見。浮費頗多。上曰。卿可謂忠愛。顧朕老矣。安得此聲。近惟葬李婕妤。好用三萬緡。他無費也。遂因轉對。乞用祖宗故事。召宰相執赴經筵。太史言十一月朔日當食。心八分。燾復條上古今日食是月者。三十四事。因奏之曰。心天王位。其分為宋。十一月於卦為復。方潛陽時。陰氣乘之。故比他食為重。非小人害政。即敵人窺中國。明日對延和殿。又及晉何曾譏武帝無經國遠圖。十一年春。乞致仕。優詔不允。上數問其疾。增損給事中宇文价。傳上旨。燾曰。臣子戀闕。非老病。忍乞骸骨。因叩价時事。勉以忠蓋。又聞四川乞減酒課額。猶手劄贊廟堂行之。病革。除敷文閣學士。致仕。命下。喜曰。事了矣。口占遺表云。臣年七十。死不為天。所恨報國缺然。願陛下經遠以藝祖為師。用人以昭陵為則。辭氣舒徐。乃卒。年七十。上聞嗟悼。贈光祿大夫。他日謂宇文价曰。朕嘗許燾大書續資治通鑑長編七字。

且用神宗賜司馬光故事為序冠篇不謂其止此燾性剛大特立獨行早著書檜尚當路檜死始聞于朝暨在從列每正色以訂國論張栻嘗曰李仁甫如霜松雪栢無嗜好無媚侍不殖產平生生死文字間長編一書用力四十年葉適以為春秋以後纔有此書有易學五卷春秋學十卷五經傳授尚書百篇圖大傳雜說各一卷七十二子名籍各一卷文集五十卷奏議三十卷四朝史藁五十卷通論十卷南北攻守錄三十卷七十二候圖陶潛新傳并詩譜各三卷歷代宰相年表唐宰相譜江左方鎮年表晉司馬氏本支齊梁本支王謝世表五代將帥年表合為四十一卷謚文簡累贈太師溫國公予屋壑塾壁真屋著作郎壑夔州路提點刑獄壁真皆執政有別傳論曰執羔宿德雅度在經筵忠忱啓沃以口舌相高為戒希呂剛直慤切有古引裾風良祐力止汎使懼開釁端忤旨竄斥而甘心焉李浩獨不造秦熺陳索以呈身為耻文若譏休兵胡沂斥闈官其清風苦節終始弗渝高孝之世李燾耻讀王氏書掇拾禮文殘缺之餘絜然有則長編之作咸稱史才然所撮拾或出野史春秋傳疑傳信之法然歟與地紀勝紹興二十九年周麟之言知双流縣李燾嘗讀皇朝公卿百官表詔給札錄付史館燾博學剛正秦會盛時嘗遣人諭燾欲得一通問即召



用燾迄不與生此偃蹇州垂二十年矣四川制置王剛中聞其名奏為幹  
辦公事繫年錄李壁鴈湖集巽巖先生墓刻 公諱燾字仁甫一字子真  
其先唐宗室右武衛大將軍德武氏之禍竄眉丹稜子孫因家焉距公十  
有七世矣大王考諱夔王考諱夙贈奉直大夫考諱中左朝奉大夫贈宣  
奉大夫妣碩人史氏公生於政和五年四月丙辰登紹興七年進士第調  
華陽縣主簿擬嘉州軍事推官未赴丁宣奉憂服除調雅州軍事推官改  
宣教郎知雙流縣辟四川制置司幹辦公事知榮州除潼川府路轉運判  
官丁太碩人憂服除召赴行在入尚書為兵部郎中以觸宣奉諱改行負  
外郎國史院編修官轉禮部員外郎遷祕書少監兼實錄院檢討官權起  
居舍人起居郎直顯謨閣荆湖北路轉運副使除祕書少監赴闕供職改  
直寶文閣主管潼川府路安撫司公事知瀘州召赴行在陞祕閣脩撰江  
南西路轉運副使召赴行在除祕書監兼權同脩國史實錄院同脩撰擢  
權尚書禮部侍郎兼同脩國史實錄院同脩撰侍講拜禮部侍郎兼工部  
侍郎以御史論公子虛發策不當黜并出公知常德府逾年提舉江州太  
平興國宮天子初行明堂禮推恩首建議者加敷文閣待制尋除知遂寧  
府召赴行在拜敷文閣直學士提舉佑神觀兼侍講同脩國史三上章請

老除敷文閣學士致仕以淳熙十一年二月五日薨于行在所享年七十  
累官至通奉大夫爵丹稜縣開國伯遺奏上聞天子哀其忠贈光祿大夫  
特命臨安府營辦葬事又出內帑金帛賜其家尋勅濱江漕臣護其喪歸  
葬蜀明年七月二十八日葬于丹稜縣龍鵠山巽巖之陽公娶同邑楊氏  
封碩人子十三人男曰謙曰垕奉議郎祕書省著作郎曰奎前知成都府  
郫縣事曰塾承務郎曰岱曰璧承奉郎前主管尚書刑工部架閣文字曰  
真承務郎女曰均適朝奉郎新知果州曹執同曰坑適朝奉郎前知普州  
師祖慶曰壇適迪功郎漢州州學教授任阜曰典適河東進士薛純穎曰  
增適從政郎榮州州學教授張仲曰堪適迪功郎鳳州兩當縣主簿勾龍  
宗愈謙垕塾堡典及純穎皆先公殆阜後公一年亦亡孫男七人曰鏗曰  
鏘曰鉢曰鋤曰鉞曰鏹孫女二人曰真曰從公高亮傑特碩大剛毅人望  
之凜然而內甚夷曠其學洞究古今會道約理晦明巨細交貫旁達其臨  
事如衡陳權設圭忝不可欺四方學者宗仰敬畏終莫測所至其在朝廷  
正色侃侃守經據古務以格君心存舊章畏天變愛民力裁恩倖峻風節  
為言不擇禍福利害以為趨舍避就挺立不撓邪枉憚焉其任外服綱張  
目舉仁行威振強暴者戢柔懦者益貪吝者化興利除弊率為後法方公

少年遭王國多難慨然有志馳驅值權臣力主和議務以術消闕天下忠義敢為之氣公竊憤之終其世不與通陸沉遠方凡三十年始登天朝屬時宰附會規挑兵端公又力爭之以為自治未至何以謀人至擯居外猶懇懇弗已晚再侍帷幄察時論浸弛慮成翫愒晏安之漸則勸上以無怠初志蓋懋遠圖述公所學考功素論則公之盛心何如也然嚴氣正性不肯纖芥徇時以故屹屹難合迄大不施獨為天子所尊禮至稱之曰有國之師表也洎將用公而公亡矣嗚呼用捨汗隆之數實關諸天豈人力哉諸孤不令何足以識公大致念葬日薄矣較德瑒辭厥艱其人敬忍死泣血先用溫文正公法書世次官簿終始以掩諸幽其論次之詳則見諸家傳云周益公大全集教文閣學士李文簡公燾神道碑韓愈以天刑人禍歸咎史筆柳宗元隨闕其說後人終致疑焉今以李文簡公驗之何疑且左氏紀諸國之事史記上下數千載是是非非利害不專及當世若公續司馬先資治通鑑為本朝長編上關國體下涉諸臣之家非異代比使天刑人禍可信孰能結知明主見推多士生歷清要沒定美謚諸子繼踐世科歷二千石光顯未艾如李氏者乎况公出入中外見謂忠直盡言交游藐視強禦雖微作史自當齟齬難合然讒間不行于朝士大夫鮮含怒

者何也。守道正。淮職公。事上不欺。應物無心。天人交助。其在茲乎。既没十八年。蜀多文士。其子不近。求銘詩而遠。屬耄老。非以同朝。久相知深也歟。是宜序而銘之。公諱燾。字仁甫。一字子真。系出唐曹恭王季子右武衛大將軍德武。后斥為民。徙眉州之丹稜縣。遂家焉。六世孫瑜。始復屬籍。仕至長江令。公長江十一世孫。曾祖夔。祖夙。贈奉直大夫。考中朝。奉大夫。知仙井監。累贈宣奉大夫。妣碩人史氏。公生政和乙未。天資穎異。博覽經傳。獨不樂王安石學。甫冠。已著兩漢鑑。明年。追念靖康變故。著反正議十四篇。人皆竒之。紹興八年。第進士。調成都府華陽縣主簿。未上。讀書本縣龍鶴山。命曰巽巖。自記云。予真子。三卜居。乃得此山。向東南面西北。其位為巽。為乾。蓋處己非乾。健無以立。應物非巽。順無以行。易六十四卦。仲尼撥其九。而三陳之。起乎履。止乎巽。此講學之序也。語曰。可與共學。未可與適道。可與適道。未可與立。可與立。未可與權。夫人各有所履。善惡分焉。惟能謙。可與共學。惟能復。可與適道。知所適而無以自立。則莫能久。故取諸常。使久於其道。或損之。或益之。至於困而不改。若井未始。隨邑而遷。則所以自立者成矣。雖然。吉凶禍福。橫發逆起。有不可知。將合于道。其惟權乎。然非巽。則權亦不可行。學至于巽。乃可與權。此聖賢事業也。年方二十四。其志

趣學問如此。久之赴華陽時。宰秦檜知公名。公不與通會。詔郡國舉賢良。公携五十策謁成都帥張燾。不果薦。秩滿外銓。復置教授闕。公亦不就。注嘉州軍事推官。丁父憂。二十年服除。再注雅州軍事推官。作當直司箴。諷郡守。用私情背公法者。總領財賦符行中。屬公增簡州鹽筴。公移書力拒之。舊相張浚謂有臺諫風。二十四年改宣教郎。知成都府雙流縣。日坐聽事。訟至立決。前執政李文會自瀘徙益府。下九縣供張加倍。公用常儀。李由他道。去仕族張氏子。競家貲。公曰。汝方在喪。忍墜先訓。盍歸思。三日復來。果悔過自新。大姓李零市丘成之產業。公以成之。不白所生母。追正之。零調辭訴府。公列經義律文致零法。豪右歛迹。邑庭如水。日繙史冊。彙次國朝事實。謂司馬光脩史。先為百官公卿表十五卷。後頗散逸。乃徧求正史實錄。傍採家集野史。增廣門類。起建隆迄靖康。合新舊官制成一百四十二卷。其重編先者僅七之一。長編之書。蓋始於此。二十九年四川制置使王剛中。辟公幹辦公事。三十二年知榮州。州因山為城。川為隍。夏秋常患水溢。公築坊禦之。隆興二年。除潼川府路轉運判官。入境刻守。令四州縣多橫斂。公選官置局。括一道財賦。列其名色。使有無相補酌。三年中數而為帳。徧示官吏。許撻不當。更定名為科約。至今不廢。母憂去官。乾道

三年召赴行在八月入對上太祖故事乞以為法請許六察言事又言軍興三十年蜀賦一錢折變百之願自此勿增取况蜀兵已多宜罷招刺嚴簡汰禁大將母張虛籍培部曲孝宗嘉納除尚書兵部郎中以父諱下行負外郎兼國史院編脩官又兼禮部會慶節上壽在郊禮散齋內議權作樂公言漢唐祀天地散齋四日致齋三日我藝祖初郊亦然自崇寧大觀法周禮分祭天地故前十日受誓戒今既合祭宜復漢唐及本朝舊制幾兩得詔垂拱上壽止樂正殿為北使權用十二月正除禮部負外郎公言中興祭典未備岳鎮海瀆先農先蠶風雨雷師九祠以酒脯代牲牢近者雨暘失節郡國水災殆或以此詔復舊占城國入貢依崇寧五年勅書用白背金花綾紙貯以金鍍銀匣公請如近例學士院謂禮部不當預公曰典禮先有司部兼掌客豈侵官耶長編卷帙漸成蜀帥汪應辰乞下臨安府給筆札繕寫藏祕閣公遂進國初至治平一百八卷持遷兩官公患時文衰弱乞令考官取學術醇正切於世用之文苟涉虛浮必行黜落明春省試勅榜戒諭上方厲精為治事或中出公輪對言唐虞三代專倚輔弼漢唐或謀卿士今捨三塗近習必進此治亂之機惟聖明深慮過防蓋有所指也又奏省闈取士本不立額乞參皇祐四百之限稍加裁定舊持奏

名雖賜出身罕授職任近兩榜至八百五十餘人放選注官而賢良方正一科則寂無應詔當責舉者讀畢遂言天下有變經營北方未見可付之人上曰朕當自將公曰聖諭及此與真宗濟澶淵合矣上曰此朕家法太祖平澤潞取維揚太宗平太原皆是也公請先自治以待時上聳聽不倦近侍皆跛倚明日諭三省議省額特恩二事有沮之者乃己五年四月遷祕書少監太史言八月日當食公上疏曰災異所以儆戒人主今經筵不訪問言路罕論奏大臣無趙普補綴奏目杜衍封還內降之風臣恐憂不在疆場惟陛下進衆正消群陰以應天變是冬兼權起居舍人六年雷震上元後一日公錄仁宗景祐三年正月甲辰求言寬賦欽二詔以進直前乞判定徽宗實錄之踈舛者因言臣方脩進治平後長編若就加討論他時可助正史詔後開寶錄院四月首命公為檢討官汪應辰進公于虜賢良詞業上曰卿有子矣范成大除右史升攝起居郎議者誤引元豐八年十月詔欲廢二浙保正止存耆長又宰相以蜀人帥蜀工部並除二侍郎武臣提點刑獄皆違舊制公援證再三上曰卿論事根據極當朕心左相陳俊卿出知福州右相虞允文既任恢復未免更張公言二典若稽古夏有典則商云成憲周云舊章漢云故事子孫莫之敢廢王安石變更法度

厲階可鑒。上欲除公兵部侍郎。公自攝記。注數論事。宰相頗不樂。公遂請去。六月除直顯謨閣。湖北轉運副使。陛辭以欲速變古為戒。又奏禹貢九州。荆田第八。賦乃在三。人功既脩。遂超五等。今田多荒蕪。賦虧十八。上委公條畫。至則言創耕。憚科歛。且畏爭奪。宜寬冒占。廣激勸。如太祖乾德四年。許見佃者。止輸舊稅。更不通檢。詔如所請。其妄執契爭奪。毋受理。守令能勸課者賞之。總賦呂游問。奏計公攝其職。歲饑。發戶部大軍倉振民。僚佐爭執。公曰。吾自任責。不以累諸君。尋如數償之。游問歸。劾公專。輒上令具析而已。七年。厘中制科。八年。以舊官趣召。會虞允文。由左相宣撫四川。自說北伐。疑公異議。預白上。改直寶文閣。帥潼川。兼知瀘州。首葺石門堡。置戍以阨夷人。叙州舊市。羈縻馬價頗平。比歲增其尺寸。償直不以時。公言國計邊防。胥失之。乞戒茶馬司。互市毋溢額。仍勿於夷漢禁山內伐木。造船尋皆報可。守邊踰歲。淳熙元年被召。適城中火。公上章自劾。既放罪矣。提刑何熙志。奏公不親至火所。併指長編。記魏王食肥彘。語涉誣謗。上曰。此載皇宋事實。何害。止命成都提刑李繫。体量火事。公行及國門。乞祠待辨。除江西轉運副使。且許臨遣。公進治平四年至元符三年長編。四百十七卷。或勸公方被謾。勿及時事。公曰。聖主全度如此。竭忠所以報也。遂



奏近者日食地震。夷狄小人不可不慮。又上快箴。引太祖退朝悔乘快決事。以諫。上曰。朕當揭之坐隅。進祕閣脩撰。旋坐火。後不盡書焚室。貶秩一等。而熙志以輒議史事。削兩官。公至江西。置一路財賦都簿。如潼川科約未幾召還。乞令本路母以臣去。廢此書。上曰。卿不為高論。務在便民。甚善。擢祕書監。權同脩國史。權實錄院同脩撰。蓋專付公以史事。故用待從之禮。三年正月也。公前數言。南郊明堂均大禮。自宜迭行通轉。對申前說。上令集議。嬖近謂於德壽宮有嫌。沮不行。及子為禮部尚書。與諸儒議。用成王宗祀文王。漢武帝陟配高祖。所謂嚴父指周公也。晉唐及本朝名臣皆有是說。非出於燾燾發之耳。其議遂定。三月除權禮部侍郎。賜服金紫。七月壬戌雷震太廟柱壞鷗尾。有司隨加繕治。公奏此非所以祇天變。當應以實。上諭大臣。燾愛朕。屢有讜言。公嘗請正太祖東鄉條。上熙寧元符紹興議論。其後卒行之。進四繫錄記。女真契丹起滅。自紹聖迄宣和靖康。凡二十卷。上曰。朕可一日忘此虜哉。九月兼侍講。以經筵小開。錄趙師民勸講箴以諷。并及仇士良不欲人主讀書。近儒生之說。會改潛邸為佑聖觀。創璿璣殿於太一宮。公密疏二千餘言。上褒答之。四年春。駕幸太學。命公執經。特轉一官。堅辭不聽。公自郎春官。已極論科舉。及持奏名。去冬乞休。

紹興二十七年二月詔書用經義詩賦論策四場如元祐時仍采蘇軾議  
量收恩科至是乃請變文體取實學以致人才上神公奏付三省下學官  
議國子司業鄭伯熊等請如公言而老生晚學詳言不便議遂格八月真  
拜侍郎仍兼工部徽錄置院久公薦呂祖謙為祕書郎兼檢討官審訂增  
削數百條書遂成特遷一官或請升降兩學從祀衆議不同第去王雱像  
用公說也元符接靖康長編成上稱公無愧司馬先後有表云豫席思言  
比迹先正指此夜直宣引奏近者蒙氣蔽日厥占不肖者祿股肱耳目宜  
謹厥與賜坐欲起上再留賜飲賜茶恩意甚寵尋詔監視太史測驗天文  
公為郎時已言乾道新曆不可用因舉差失數十條詰太史局官皆無以  
對然卒無知曆者公又欲叅酌開寶通禮政和五禮新儀為一書雖下禮  
官亦不能成九月丁酉日當夜食公為社壇祭告官伐鼓禮廢公舉行之  
先是屋入祕書為正字旋兼國史編脩實錄檢討遷校書著作父子同典  
史事搢紳榮之公感上知論事益切每集議衆未發言公條陳可否無所  
避會近臣復舉公次于塾應科目黜於閣試屋適考校上舍生發策云云  
為御史所劾語併及公屋降一官罷公以本官知常德府初政和七年鼎  
澄辰沅靖州置營田乃弩手司給餉募人開邊范世雄張察等附會擾民

建炎三年。亟罷之。乾道未守。陞劉邦翰。請復行於辰沅靖三州。公為轉運。謂不當復。已而提刑尹機迫郡縣行之。田不能給。公至。請度田立額。事下。諸司公獨約。帥臣張栻具奏。上即從之。境多茶園。異時禁切商賈。率至交兵。公曰。官捕茶賊。豈禁茶商。聽其自如。迄無大吠警。六年。丐開提舉江州。太平興國宮。是秋行明堂大禮。上以公首建議。特除敷文閣待制。頃之。虜墊繼亡。上欲以吏事銷憂。起知遂寧府。用蔡挺。湮原銜教法。闢勤武堂。親閱士卒。其雜居市廛者。葺營聚之。七年。史院進四朝正史。經脩官在外者。例減磨勘二年。宰執奏正史頗採李燾長編地里一志。又出其手。詔減年外別轉一官。公自奉議郎年勞賞典。積官朝議大夫。避父名。遇遷秩。寄理者三。於是轉通議大夫。公以酒課加重。奏權酤起王莽。而成於德宗。本朝郡釀有數。監司尚不許。今乃設法勸飲。以耗民財。縱未能盡弛。猶當用買撲舊法。罷去官監。上意鄉之。而計司迫贍軍日減三十緡而已。公節用度。停燕集。官府肅然。前得旨長編。或有增損。依熙寧脩三經義法具奏。至是上四十四百五十餘條。又以一百六十八年事。散九百八十卷。一覽難周。別為舉要六十八卷。總目五卷。脩換事目十卷。時召命已下。公控辭久之。上數詢來期。十年六月對延和殿。適英方讀陸贄奏議。公撫贄言。切今者。

數十事勸上力行且曰贊雖相德宗其實不遇今可謂千載一時上曰惟不遇於當日是以言垂後世公又奏陛下即位二十餘年志在富強而兵弱財匱與教民七年可以即戎異矣上有無功業之歎公曰功業見乎變人事既脩天應自至上卿宿德者儒宜在左右任史職進敷文閣直學士提舉佑神觀兼侍講同脩國史七月久旱公進避殿損膳求言故事上亟施行命侍從臺諫兩省卿監館職實封言事趙彥中草詔云意者委任或非其人公奏陛下委任不過三四大臣神宗語富弼云唐太宗與魏謩議政全似爭競宜勅二府以魏徵為法母若元豐王珪號三旨相三旨者謂上有可否珪曰領聖旨諭軍國事曰誠如聖旨啓擬曰取聖旨也又謂戶部不足南庫有餘請如唐建中龍瓊林大盈庫歸左藏上以奏付外讀者失色丁丑遂雨一日宣對公言外議陛下多服藥罕御殿宮嬪無時進見浮費頗多上曰感卿忠愛然朕春秋已高安得此聲近聞葬李婕妤好用三萬緡他無費也上憂熒惑嘗入斗公言天道遠惟正厥事可以弭災類次漢元鼎至宣和四十五事以進十一月朔日當食心八分公曰心為宋分為天王位潛陽將復陰氣乘之小人害政夷狄窺中國之象復條上古今日食是月者三十四明日對及晉何曾譏武帝無經國遠圖上甚

嘉獎是歲公賦詩云明年七十吾歸矣預買北關門外舟至冬疾作三省請給告十日上曰老者不以筋力為禮可半月十一年春表乞致仕優詔不允上數問宰執公疾增損何如萬里召來豈容輕去丞相王淮曰燾知進退宜從所請上曰朕不幸有故於道路柰何可諭其鄉人給事中宇文价留之价傳上旨公曰臣子戀闕非老疾忍乞骸骨因詢价時事勉以忠蓋聞四川制置使留正總領馮憲論減酒額猶手劄贊廟堂行之二月病棘甲子除敷文閣學士轉一官致任命下喜曰事了矣口占遺表云臣年七十死不為天所恨報國缺然願陛下經遠以藝祖為師用人以昭陵為法辭氣安定俄卒上聞嗟惻賻銀絹三百疋兩贈光祿大夫令臨安治後事沿江漕司津置歸舟他日語宇文价曰朕嘗許燾大書績資治通鑑長編七字且用神宗賜司馬光故事為序冠篇不謂止此也公孝友誠實性無嗜好惟潛心經史有易學五卷春秋學十卷故其出處本於絜靜精微著述則評論今古別白善惡得褒貶之旨所至求與篇隱帙傳錄讎校雖陰陽小說亦無遺者家藏積數萬卷為文語道而理備考蜀類試叅詳南省多得名士薦人輒削橐前兩入朝適虞允文暨趙雄當路士大夫爭談兵二公皆蜀人雅敬公公一無所徇晚在經筵人頗懷安公為上言前日

紛紛。今日默默。俱非自治。其持論不隨時類此。公著五經傳授尚書百篇圖。大傳雜說七十二子名籍各一卷。文集五十卷。奏議二十卷。四朝史槩五十卷。通論十卷。南北攻守錄三十卷。七十二候圖。陶潛新傳。并詩譜各三卷。歷代宰相年表二十三卷。唐宰相譜一卷。江左方鎮年表六卷。晉司馬氏本支。齊梁本支。王謝世表。五代三衙將帥年表。各一卷。本朝事始兩卷。建隆遺事。辨趙普別傳科場沿革。集賢學士并賜帶典故各一卷。范韓文富王歐陽司馬三蘇及六君子年譜各三卷。明年七月己酉。即葬巽巖之陽。妻碩人楊氏。同邑。贈朝散大夫。素之孫。黃庭堅為記。大雅堂者。後公八年卒。祔馬七子。謙早死。廔終奉議郎。主管成都府玉局觀。至今為朝請郎。權發遣忠州。塾終承務郎。瑩亦亡。璧。真皆登科。璧今為朝散郎。權發遣漢州。真承議郎。主管華州雲臺觀。六女。均適朝散郎。知果州曹執中。坑。適朝奉大夫。知崇慶府師祖。慶壇。適文林郎。漢州州學教授任阜。典。適薛純。穎。增。適承議郎。充雲安軍使。兼知縣事。張仲堪。適朝散大夫。利州路提點。刑獄公事。范子庚。孫十一人。鏗。宣。義。郎。錫。脩。職。郎。彭州九龍縣主簿。鏗。銖。銖。周。錡。鏞。銓。積。簡。其三人今亡。銖。周。鏞。也。女三人。長。馴。早夭。次。真。適脩。職。郎。孫。綱。亦不在。從。適。迪。功。郎。新。羅。山。縣。簿。尉。劉。成。季。曾。孫。十一人。公。

爵丹稜縣開國伯。食邑七百戶。諸子升朝。贈少師而贈楊氏福國夫人。銘曰。尚書記言。春秋書事。經別以六。史居其二。漢太史公。儀尊相臣。我朝大典。亦歸宰庭。時政有記。起居有注。東觀石渠。諸儒所聚。設官分職。上下相維。合力纂脩。猶懼闕遺。公生遐方。初筮州縣。間於期會。屈首鉛槧。祖功宗德。業鉅事叢。政有因革。論多異同。禮樂制作。夷狄叛服。原始要終。咸舉綱目。三入承明。迄用奏篇。帝擬以光。士推如遷。問胡云然。多聞諒直。舞禮文姦。視若仇敵。以此事君。忠讜不欺。出而臨民。敬簡無私。赫赫榮名。番番壽考。慶流子孫。殃則何有。螭首龜趺。刻以銘章。申勸剛者。公為不亡。朱子語類論李仁甫通鑑長編曰。近得周公益書。亦疑其間考訂未甚精密。因寄得數條來某看。他書靖康間事最踈略。如姚平仲劫寨。則以為出於李綱之謀。种師中赴敵而死。則以為迫於許翰之故。全不知二事俱有曲折。劫寨一事。決於姚平仲。僥倖之舉。綱實不知。按綱除知密院。辭免劄子內云。方脩戰具。嚴守備。以俟。授師來。便迫虜。使進不得攻。退無所掠。勢窮而遁。俟其渡河。半濟而擊。勝可萬全。而平仲引衆出城。我敗乃事。然平仲受節制於宣撫。不關白於行營。二月八日夜半。平仲之出。种師道不知之。在微臣實無所與。當時執政。如耿南仲輩。方極力沮綱。幸其有以藉口。遂合為

一辭謂平仲之出，綱為其謀。師中之死，亦非翰之故。按中興遺史云：河北制置副使种師中軍真定，進兵解太原圍，去榆次三十里，金人乘間來突。師中欲取銀賞軍，而輜重未到，故志離散。又嘗約姚古、張灝兩軍同進，二人不至，師中身被數創力戰，又一時死之。朝廷議失律兵，將中軍統制官王從道朝服而斬於馬行中。脫如所書，則翰不度事宜，移文督戰，固為有罪。師中身為大將，握重兵，豈有見樞府一紙書不量可否，遂忿然赴敵以死？此二事蓋出於孫覲所紀。故多失實。問覲何如人？曰：覲初間亦說好話，夷考其行，不為諸公所與。遂與王及之王時雍、劉觀諸人阿附耿南仲，以主和議後，竄嶺表。尤銜諸公。見李伯紀輩望風惡之。洪景廬在史館時，沒意思謂靖康諸臣覲尚無恙，必知其事之詳。秦乞下覲其所見聞，進呈乘筆之際，遂因而誣其素所不樂之人如此二事是也。仁甫不審多采其說，遂作正文書之。其他紀載有可信者，反為小字以疏其下，殊無統紀。遂令觀者信之不疑，極是害事。當王允之殺蔡邕也，謂不可使佞臣執筆。在幼主旁，使吾蒙訛議，允之用心固自可誅。然佞臣不可執筆，則是不易之論。

**李熹**

宋李璧鴈湖集叔父成都府君墓誌銘。叔父諱熹，字明甫，姓李氏，陵州府君之季子也。世家眉之丹稜，曾大父諱某，大父諱



某贈奉直大夫陵州府君諱某正奉大夫叔父生二十四年以蔭補官監雅州廬山縣酒務歷利州潼川府兩路提點刑獄司檢法官終宣教郎知成都府成都縣享年五十有三叔父賦資原慤保樂易然與人交無諂突佞辭勢利之際未嘗輕變所守以徇之雖律令精習而持心近厚所居官必斥去雕瑤不求知名號稱長者陵州府君官至二千石蓋將老而田不滿一廛叔父既仕則益礪廉節每退歸僦屋以居或日盱不得食人不勝其憂叔父處之晏如也及啓手足罄所有不足以充凶事嗚呼浮沉不遇既莫克充其蘊於時而見于行已僅如此者抑可謂賢矣性嗜酒遇興即滿引倒冠落珮殆遺形骸有詩七十餘篇不為藻繪蘄刻而務達其意間閱陰陽歷筭方技之書皆深得其要而亦未嘗以語人也娶何氏有男子二人曰斐曰重女長適承議郎新知昌州楊已千次適進士劉奎季尚幼叔父之卒寶淳熙二年戊辰後七年十月辛酉始克葬于丹稜縣樂扶鄉永壽里石子山之原屬太史公守東藩斐來乞銘太史公春秋高觸緒多感憚於涉筆則語斐曰昔劉道原之葬實以溫公十國紀年序為銘凡吾與而父平生之言乙未歲祭文蓋盡之其可刊已斐拜且泣曰不朽之託固在斯文然名氏未見敢重以請太史公乃以命某某謹論次叔

父歷官終始而繫之銘銘曰渾然天質不見芒銳胡不顯融忽  
考已逝御幸篆銘以妥厥瘞後或有考尚知為太史公之弟也

# 李亮

宋王灼頤堂集李教授墓誌銘 紹興九年灼官夔州鈐轄安撫司幕府臨叩李亮字長孺與其弟防以父命遊學吳中來扣

門求交時主帥馮公康國見而奇之留語十日其舟送出關後三年灼被檄至臨安二子相從益詳其為人方國家盟敵大脩廢典士爭詣公車進說求售二子質草廡三間闔戶誦書菜豆自給氣貌甚恭勢官顯公欲一識面類多拒絕不知者謂非仕家子亦疑其遠來竟何也吳中士大夫以是盛稱蜀二李又明年興太學長孺選充弟子員又明年登進士第授順政主簿順政蜀北邊恐貽親憂歲求檄一歸提點刑獄俾攝幹辦公事諸臺高其能薦書滿篋除絳州學教授丁父憂哀慕骨立二十二年三月某甲子以毀卒年四十九長孺事父母得歡心友愛防至不相捨詩文典重有法作字出入歐虞間赴人急難勇前不顧平居退然若不能言遇事切利害揚袂劇談無少惜系出唐蔡王某幾世祖暉入蜀其後居叩之大邑曾祖諱洵任太常寺奉禮郎贈宣奉大夫祖諱道原任朝奉大夫累贈左金紫光祿大夫父諱顯任右朝奉大夫妻王氏右朝奉大夫某之女男曰剛

四女王之獻。王拱玉勅其婚也。年尚幼。王氏有賢行前卒。紹興二十四年十二月某甲子。防得吉卜舉親喪於大邑之白雲里長溪山。遂以先嫂祔葬。灼既銘朝請公墓。防繼請曰。長孺止此。家禍極矣。願備書用慰死者及其孤。銘曰。毀死非聖制也。而實厚於仁。士不幸如長孺。使孔子作。亦將哀其志。以成其名。死者生。生者死。孝寧親幸哉。長孺有志則伸。

## 李防

臨邛郡績志李防字幼安。大邑人。即開國公道原之孫。既冠與兄亮游。上庠亮登紹興甲子第。公獨留京師。以天下之本末立

上書。懇切當軸者。以為譏切。時政責徽州。聽讀會恩。還上庠。以誤權臣得罪。遂負大名築室湖上讀書。一時搢紳爭與交遊。後以蔭補出官。至今調神泉主簿。縣事多所資益。一意勾稽。吏不容姦。公私咸賴。比終更三年。鈔附無有遺者。悉舉以歸。縣士論敬服。達而用世。必有愛人利物者。再調溫江。薄泊然無宦情。在官未幾。即致其仕以歸。今年踰八十。極壽健。杜門讀書。手不釋卷。足以佚老焉。

## 李柔中

紹興正論小傳李柔中。紹興九年。胡銓奏封事。乞斬秦檜。檜怒。議竄銓。昭州搢紳重足一迹。柔中獨上書闕下。數檜

十罪以救銓檜益怒送

大理寺燬煉死獄中

# 李彙

赤城志李彙單懷人字推之紹興九年通判州事因家天台官至朝議大夫撰九天僕射祠祀

# 李靚

宋史忠義傳李靚字彥和吉州龍泉人幼孤母督之學不肯卒業母詰之辭曰國家遭女真之變寓縣雲擾士當捐軀為國戡

大憝安能咕囁章句間効淺丈夫哉岳飛督師平虜寇挺身從之未行奔母喪服除走淮南以策干都督張浚浚奇之使隸淮西總管孫暉戲下累

功授承信郎紹興十年金遣其將翟將軍犯境靚與部曲當其鋒轉戰至西京天津橋南俘翟將軍乘勝遂北會金兵大至遂死之年三十一原附

孫暉傳下宋周益公大全集忠義李君傳中興初女真犯金陵吉水楊公守節死官天子既追爵四品即其地立廟又易名忠襄書勲太史徧錄

諸孤加賜腴田忠義大節卓卓在人耳目搢紳甲冑間皆喜傳而樂道之况於同州之士豈無聞伯夷而立志慕相如而更名者耶今於龍泉李君

見之矣李君名靚字彥和父俠早世母勉以讀書一日投筆歎曰天下方擾擾男兒要當搴旗斬將立功名於無窮安能齷齪事章句哉聞

大將岳飛銜命平虔寇。即挺身奮奔母喪。不竟其功。釋服走淮南。以  
策干張丞相。丞相奇其材。遣隸淮西總管孫暉。戲下積功。授承信郎。紹興  
十年夏。番將翟將軍入寇。暉分兵禦之。君獨與部曲晝夜轉鬪。至西京天  
津橋南。大小數十戰。殺傷不可計。卒俘翟將軍。乘勝逐北。虜益濟師。遂死  
之時。五月二十四日也。年三十有一。後一月事聞。詔贈君兩官。有子與父  
恩澤。賻卹加等。予得於郡人者如此。常恨未能訪其家。乾道八年秋。君之  
子思忠寔來。袖書一通。陳義崢嶸。予竊嘉之。明日泣而請曰。吾父死國時  
官甚微。不得如忠。襄公大顯于世。且上許貶恩。而思忠適在襁褓。不能自  
列於有司。承天子之命。丐公一言。傳信四方。以附九泉。且無使國家旌忠  
卹孤之恩。委於草莽也。予曰。甄濟詐暗。不受祿山逼。韓退之謂當附書於  
史。子逢能標白其先人。俱當得書。今爾父死王事。名在司勳。且有詔。俾爾  
世其祿。視甄氏父子。蓋易以顯。子昔執筆。隸太史。而不以告。今尚何道。思  
忠曰。不孝之罪。昭昭矣。雖然。里中多名士。惡知無位于朝。任斯責者。  
第為我書他日。司馬遷言。荆軻庶幾徵。夏無且乎。予曰。然。退為之書。

# 李琪

元一統志。李琪。宋紹興十一年。虔州免解進士。特封養素居士。  
琪。贛縣人。朴之從子也。循義脩潔。該通經典。故江西諸司。上其

行義于朝。子謙字和卿。居在城華坊。少孤力學。卓然不群。登進士第。調安福縣尉。獲盜不願受賞。入為蔡院宗簿。太常丞。出為浙東提舉。值歲飢。兼賑濟活人甚多。召為尚書左郎官。遷左司郎中。卒于官。號雲峯居士。

永樂大典卷之一萬四百二十一



永樂大典卷之一萬四百二十二

四濟

李

李浩

宋史列傳李浩字德遠其先居建昌遷臨川浩早有文稱紹興十二年擢進士第時秦熺挾宰相子以魁多士同年皆見之或

拉浩行毅然不往調饒州司戶參軍襄陽府觀察推官連丁內外艱繼調金州教授改太常寺主簿尋兼光祿寺丞輪對首陳無逸之戒且言宿衛大將軍楊存中恩寵特異侍之過非其福上悟旋令就第自秦檜用事塞言路及上總攬權綱激厲忠讜此習尚存朝士多務慎默至是命百官轉對浩與王十朋馮方查齋胡憲始相繼言事聞者興起浩不安於朝請祠主管台州崇道觀以歸孝宗即位以太常丞召時張浚督師江淮宰相多抑之浩引仁宗用韓琦范仲淹詔章得象故事乞戒諭令同心協濟兼權吏部郎官浩雅為湯思退所厚御史尹穡欲引之以共擠浚因薦浩及對乃明示不同之意二人皆不樂踰年始除負外郎兼皇子恭王府直講在王府多所裨益且因事以及於冊幸上或見之王亦素所愛重



他日外補累年以歸。王喜曰：李浩未矣。未幾宰相召為郎者四人，將進用之。尤屬意浩。浩嘿然無一辭。同舍皆遷。浩獨如故。踰年浙河水災，詔郎官館職以上條時政缺夫。浩謂上憂勞如此，今何可不言。即奏疏指論近臣併及宰執，惟奉行臺諫多迎合百執事，顧忌畏縮，反覆數十言，傾倒罄竭。見者悚慄。上不以為忤，執事者深忌之。乞外得台州。州有揀中禁軍五百人，訓練官貪殘，夫衆心不逞者，因謀作亂，忽露刃於庭。浩謂之曰：汝等欲為亂乎？請先殺我。衆駭曰：不敢。乃徐推其為首者四人，黥徙之。迄無事。除直祕閣，並海有宿寇久不獲，浩募其徒自縛贖罪，即得其魁。里豪民鄭憲以貲給事，權貴人門囊橐為奸事，覺械繫之，死獄中。盡籍其家，徙其妻孥，權貴人教其家訟寃。且誣浩以買妾事，言者用是擠之。疏方上，權叅政劉珙越次奏曰：李浩為郡，獲罪豪民，為其所誣。臣考其本末，甚白。上顧曰：守臣不畏強禦，豈易得邪？且問章安在。珙袖出之，遂留中不下。大理觀望，猶欲還其所沒貲。上批其後曰：台州所斷，至甚允當。鄭憲家資，永不給還。流徙如故。浩始得安。明年除司農少卿。時朝廷和糴米八萬，董其事者賤糴濕惡，隱刻官錢。戶部不敢詰，浩發其奸。下有司窮覓，戶部欲就支稽見數。大理附會之。浩爭曰：非但惠奸，且虧軍食。上是其言。會大理奏結他

獄。上顧輔臣曰：棘寺官得剛正如李浩者為之。已而卿缺。又曰：無以易浩。遂除大理卿。時上英明。有大為起志。廷臣不能奉行。誕慢苟且。依違避事。浩前在司農。嘗因西對。陳經理兩淮之策。至是為金使接伴。還奏曰：臣親見兩淮可耕之田。盡為廢地。心嘗痛之。條畫營屯。以為恢復根本。又言比日措置邊事。甚張皇。願戒將吏。嚴備禦。無規微利近切。日與大臣脩治。且結人心。持重安靜。以俟敵釁。上悉嘉納。宰相議遣浩。浩與辨其不可。至以官職誅之。浩怒。以語觸之。且力求外。以直竇文閣。知靜江府兼廣西安撫。有尚書郎入對。論及擇帥事。上曰：如廣西朕已得李浩矣。又諭大臣曰：李浩營田議甚可行。大臣莫有應者。浩至郡。舊有靈渠通漕運。及灌漑。歲久不治。命疏而通之。民賴其利。豈管所隸安平州。其酋恃險。謀聚兵為邊患。浩遣單使諭以禍福。且許其升赦自新。即日叩頭謝過。焚徹水柵。聽大府約束。治廣生年。召還入對。論俗不美者八。其言曰：陛下所求者規諫。而臣下專務迎合。所貴者執守。而臣下專務順從。所惜者名器。而僥倖之路未塞。所重者廉恥。而趨附之門尚開。儒術可行。而有險詖之徒。下情當盡。而有壅蔽之患。期以氣節。而偷惰者得以苟容。責以實效。而誕謾者得以自售。上問誕謾謂誰。浩具以實對。謂宰相曰：李浩直諫。遂除權吏部侍

郎時政府有怙寵竊權者。黨與者。自浩之入。已相側目。且欲以甘言誘之。浩中立不倚。拒弗納。於是相與謀。嗾諫議大夫姚憲論浩以彊狠之資。狹奸諛之志。寘之近列。變亂黑白。未及正謝而罷。乾道九年。提舉太平興國官。明年下夔路闕帥。命浩以祕閣脩撰寵其行。夔有羈縻州曰思州。世襲為守。則田氏與其猶子未協。將起兵相攻。浩草檄遣官為勸解。人感悟。歃血盟。盡釋前憾。邊得以寧。踰年以疾。請祠。提舉王隆萬壽宮。命未至。以淳熙三年九月卒。年六十一。諸司奏浩盡瘁其職以死。詔特贈集英殿脩撰。浩天資質直。涵養渾厚。不以利害動其心。少力學。為文辭。及壯。益沉潛理義。立朝慨然。以時事為己任。忠憤激烈。言切時弊。以此見忌於衆。平居未嘗假人以辭色。不知者以為傲。或譖於上。前上謂斯人無他。在朕前亦如此。非為傲者。小人憚之。誘以祿利。正色不回。謀害之者。無所不至。獨賴上察其衷。始終全之。為郡猶潔已。自海右歸。不載南海一物。平生奉養。如布衣時。風裁素高。衣不敢干以私云。臨川志。李浩早以文名。晚喜性理。與復齋先生翻善。言論互發。象山先生每以古人尊之。其葬也。南軒以古遺直銘其墓。子肅。字仲欽。幼嗜學。嘗讀史至晏子御者。氣揚揚曰。以富貴驕人。妻子亦笑之。侍郎嘉其識。鎖廳省試。別頭。皆第一。登淳熙八年第。授潭

州司戶攝理掾獄。有疑輒平反。再調江西北運司帳司秩滿。例有送還錢卻不受。當路因舉廉吏。公笑曰。此足為廉耶。監文思院中門。兩易衡州教授。士多嚮慕。齋舍無所容。則闢武侯祠以居之。其講明以辨義利為先。卒年六十二。孫復登嘉定元年第。宋張南軒集吏部侍郎李公墓銘。淳熙三年九月庚戌。祕閣脩撰知夔州兼夔路安撫使臨川李公。以疾沒于州治之正寢。五年其孤鞏以同郡曾季狸所狀公行義來請銘。某平時蓋欽公之為人。且在廣右與公相望。僅再歲。接公行事為詳。既不克終。辭力叙而銘之。公諱浩。字德遠。一字直夫。家居建昌人。其徙臨川。方再世。曾祖之遇祖既皆不仕。考彥以公贈朝奉大夫。公自幼入鄉校。蘄然異常兒。未冠有文名。紹興壬戌進士第。是歲秦熈挾宰相子以魁多士。同年多往見之。或拉公行。毅然卒不往。調饒州司戶叅軍以歸。連丁內外艱。中間為襄陽府觀察。推官。僅踰年及免。先大夫喪。調金州州學教授。改監行在。雜買場門。實二十七年之冬。時秦檜蓋死矣。明年主管刑工部架閣文字。改勅令所。刪定官論者。爭言秦檜時事無巨細。一切更改。公白宰相執政。蚩尤五兵。李斯篆隸。苟便於世。亦不當以人廢。方檜在時。公義不為之屈。及其身沒。事變所論。乃如此。則公存心平。可見矣。又明年改秩除太常寺主

簿尋兼光祿丞輪對首陳無逸論宿衛大將恩寵太過嬰兒過飽恐非其福太上皇感其言宿將旋就第自檜扼塞言路士風寢衰及太上總攬萬機激厲忠讜而餘習猶未殄朝士多務緘默至是百官轉對公與王十朋馮方查齋胡憲始相繼有所開陳聞者興起太學之士至為五賢詩以述其事然公自是亦不安于朝請祠以歸主管台州崇道觀今上即位之歲以太常丞召至闕首論聖學以為人主務學則其餘嗜好無間而入矣時忠獻張公督師江淮而宰相有異議者從中多所沮抑公引張仲孝友之詩及仁宗用韓琦范仲淹詔章德象等故事乞戒諭朝廷同寅共濟俄兼權吏部郎官御史尹穡附宰相湯思退以公故嘗為思退所知欲援引共擠忠獻於是薦公及對乃明示不同之意思退穡皆不樂踰歲始正除吏部員外郎兼皇子恭王府直講其後宰相召同為郎者四人欲有所進用最屬意於公公不發一語明日同舍皆遷公如故其在王府多所裨益且因事以及時政書之于冊幾上或見之王亦愛重公它日公補外累年以歸王聞之欣然謂僚屬曰李直講來矣蓋公之誠意有以感動也為郎踰年會浙河水災詔郎官館職以上條時政闕失公歎曰上憂勞求言此豈可失也即日奏疏指論近密且併及宰執奉行臺諫迎合百執事

顧忌畏縮之罪。及復數千言。近世論事。傾倒剴切。未有其比。聞者皆縮頭。上優容。曾不以為忤。而執事者忌之。甚。旬外。補得知台州。州有棟中禁軍五百人。朝廷置訓練官。統之。其人貪殘。失衆心。不逞者乘間謀作亂。露刃立堂下。公曰。汝等欲為亂乎。請先殺我。衆色駭曰。不敢。乃徐推其為首者四人黥徙之。迄無事。公倉卒應變。坐折姦萌。聞者益歎儒者誠有用於世也。天子以為能。除直祕閣。並海有宿寇。久不得。公募其徒。自縛以贖罪。即得其渠魁。未幾。召還。復為故所居官。初。公在台。有豪民鄭憲。以貲給事於權貴人之門。為一郡害。會姦利事發。械繫死於獄。盡籍其家。徙其妻子。至是。權貴人教其家訟。冤且誣。公以買妾事言者。用是擠公。它日。宰執將進呈文書。同知樞密院兼權叅知政事劉珙。越次奏。李某為郡。疾惡大過。獲罪。豪民為其所誣。臣考視其本末。甚白。上顧曰。守臣不畏強禦。豈易得耶。珙曰。士氣不振久矣。若更沮李某。是終不復可振矣。上問章安在。珙袖出之。遂留中不下。而大理觀望。權貴人猶欲還其所沒貲。併以為台州議刑太重。上親批其後。曰。台州所斷。委得允當。鄭憲家貲。永不給還。流徙如故。公乃安。明年。遷司農少卿。時朝廷和糴米。凡八萬石。而董事者有所憑恃。賤糴濕惡。以欺沒官錢。戶部不文。覲事即奏。請下有司治。大理附會。聽

戶部以支為盤。公力爭曰：是非未定，且虧軍食。上是其議。會大理奏詰它獄，上忽顧輔臣曰：棘寺官當得剛正。如李某者為之已，而卿缺。又曰：無易李某，遂除大理卿，兼同詳定一司，敕令故事。寺獄空，上表賀，公獨不奏。先是，公在司農時，嘗因面對經理兩淮之策，至是為接伴使，還奏曰：臣親見兩淮可耕之田，盡為廢地，心實痛之。條畫營田，便利甚悉，且併謂近日措置邊事，甚為張皇，一時誕謾之徒，言虜勢衰弱，踊躍自奮，甚者故為割攘，以挑境外。此何益？徒有害。願戒將吏，嚴禁防，無速近切，無規小利。日與大臣脩明治具，固結人心，持重安靜，以待虜釁。公之意，以謂主上英明，有大有為之志，執事者所當奉承，講究為務。實經久之計，以卒成聖志。廷臣中誕謾者，但為欲速之說，而其苟且者，又欲一切不為，適足以害遠謀。玩歲月，故再三條陳營田便利，以為是恢復根本之策。在今日所當汲汲而為之也。上每改容嘉納，宰相方議遣浩，使公與辯，其不可。至以官職誅之。公怒，以語觸之。且力求外，以直寶文閣，知靜江府。至管廣南西路，經略安撫司。公事命下之日，尚書郎有入對論擇帥事者，上欣然顧之曰：如廣西朕已得人矣。李某也。又論大莩，曰：李某營田議甚可行，而大臣莫有應者。公至鎮，勤於民事，郡舊有靈渠，通漕運，且溉田甚廣。近歲頗堙塞，公命疏

治之。民賴其利。立石以紀。邕管所隸。羈縻安平州。其酋恃險。出橫聚兵。謀為邊患。公遣單使。開心見誠。諭以禍福。引赦使自新。即日叩頭謝過。焚撤水柵。爰約束前帥。建議於宜州境。南丹州置買馬場。朝廷用其議。下經略司。公力爭其不可。遂止。衆謂南丹買馬之議。若行其為。廣西生事。致釁。有不可勝言者。非公言之力。朝廷亦未悉其利害如此也。朝廷又令市象于交趾。公復力爭。及公去。經略司竟往市交趾。遂因此驅以入貢。所過為擾。人始服公之明。治廣二年。召選人對論俗不美者八。其言曰。陛下所求者規諫。而臣下專務迎合。陛下所貴者執守。而臣下專務順從。所措者名器。而僥倖之路未塞。所重者廉耻。而趨附之門尚開。儒術可行。而未免有險諛之徒。下情當盡。而未免有擁蔽之患。期以氣節。而偷懦者得以苟容。責以實效。而誕謾者得以自售。上嘉納之。且詢所謂誕謾之人。公以實對。翌日謂宰相曰。李某直諫。遂擢權尚書吏部侍郎。時政府有怙寵竊據者。又附之同升者。從臣中。又有為之役者。公之造朝。已甚側目。且巧為語以鉤致公。皆厲色辭以拒之。於是相與謀。使言者論公。以謂寘之近列。必變亂黑白。未及正謝而罷。是歲冬。提舉江州太平興國宮。明年夏。夔州路以缺。帥聞上顧念公。乃除祕閣學士。其行部有恩。州亦羈縻也。其守田氏。



與其猶子為貳者不協。且起其親草檄遣官諭之。二人感悟。軟血家廟。盡釋前憾。遠以安安。蓋與廣西安平州一律。公之為謀。大抵欲以誠意銷患於未然也。在鎮踰年。以病請祠。改提舉隆興府。王隆萬壽宮。命未至。而公沒矣。享年六十有一。積官至朝奉大夫。監司奏公盡瘁其職。以死特贈集英殿脩撰。公之葬。在撫州金溪縣歸請鄉。靈谷山之原。娶饒氏。封宜人。後公八月而卒。子男四人。鞏脩職郎。潭州司理。叅軍。肅迪功郎。潭州益陽縣主簿。蔚將仕郎。遵。未仕。女六人。長適承議郎知袁州萍鄉縣事王謙。次適降授迪功郎前湖南安撫司准備差遣曾擢。次適鄉貢進士姚彬。餘未嫁。孫四人。孫女三人。有文集奏議。王府講議。箴于家。公少時力學。為文章。及壯歲。更留意義理。其仕于朝。慨然以時事為己任。見政有缺失。用人有儉佞。忠憤感激。所言多切。至生平不事表襮。未嘗勉強色詞。故不知者多以為傲。或以是譖公。上曰。斯人無它。在朕前亦如此。非為傲者也。小人憚之。謀所以害公者。無所不至。獨賴上終始照見保全之。其為郡奉法循理。律已甚嚴。自嶺右歸。裝無南物。視其奉養。自為布衣。至侍從。未嘗有異風望。整整人不敢干以私。然亦為是悅。公者少。不悅者衆。及聞其死。則識與不識。皆歎惜曰。奈何失一正人。蓋其天資質實。不徇於外。而涵養渾

厚不以利害動心。故遇事有力。奮發忠言。無所回撓。所謂古之遺直者。若公非耶。銘曰。士或不競。枉尺直寸。以同為和。以怯為巽。垂紳立朝。噤莫肯言。就有欲言。亦弗究宣。謂予有待。實則患失。曾是詭隨。乃曰弗激。此風流行。非國之福。不有君子。孰振孰篤。我觀李公。披腹敷陳。反復無隱。心乎愛君。衆駭縮頭。君則容之。媚恚實繁。聚而攻之。是保是用。惟天子明。匪天子明。臣言曷伸。嗟哉。若人古之遺直。我作銘詩。以詔罔極。陸復齋集祭李德遠文。余之生後公十有六年。於鄉黨視公為先進。方余弱冠。年少氣銳。聞公之學而疑焉。欲求見而訂之。及其見公。則猶河伯之於海。若也。蓋於是始自知不足。退而求之。十有餘年。而後知公之所存人之知公。以學則豐以才則雄。以識則通。以文則工。其立朝蹇蹇。直道進退。則有古人之風。朝除從官。群小慕擠。卒以不容。仕雖不可謂之達。而二司農長大理。帥廣之桂。與蜀之夔。皆名藩大郡。亦不可謂之窮。此人之所同知者也。而余之知公。則進乎是矣。公嘗謂余。子既脩己。達則可行。而我內省。方且有愧。蓋公之沒。而余學始少進。思欲與公論之。而天嗇於是。凡余所以自知不足。而深思力索。不敢自怠者。皆自公發之也。則不忘於公者。豈獨鄉里之情哉。公之沒也。余方以罪繫羅。既不及哭公之柩。又不得望公之

葬今既除喪乃克拜公之墓  
哀而叙予情惟公之靈尚克知之

# 李巨源

嘉定鎮江志李巨源字元通金壇人唐宗室之裔紹興十三年陳誠之榜博學有文與正言表字游終太平州司戶

蘇岸送其赴泚潮陳氏館詩神騎鯨公手漢於菟並駕殊非李與蘇又云  
留中歷歷難侯書落筆轟轟走坂車鱗作五言玉節信直併病渴馬相如

于大諒  
特科

# 李守素

紹興正論小傳李守素紹興十年知雷州倚郭海康縣舊  
相趙鼎再謫吉陽軍經過雷陽太守王超今應付崔夫脚

事合降官該赦閣  
磨勘至今未放行

# 李康臣

南海志李康臣南海人好學嗜古名聞州里紹興十四  
年領鄉薦明年登進士第嘗知昌化軍官至朝散郎

# 李爽

鄱陽志李爽字世德安仁人登紹興十五年進士第終會稽尉  
熊彥詩惜之曰鄉夫一賢位夫一士經夫一師於諸子百家之

書無不讀。有易傳、春秋辨例、雜著三十卷、詩五卷、詩話二卷、號鳳山先生。族子覲，以詩禮名家，有擁萬堂。

李衡

宋史列傳。李衡字彥平，江都人。高祖昭素，仕至侍御史。蘇州志：曾祖誥，祖處約，父預，至衡始居崑山。衡幼善博誦，為文操筆立

就，登進士第，授吳江主簿，有部使者，怙勢作威，侵刻下民，衡不忍，以敲朴迎合，投劾于府，拂衣而歸。蘇州志：二十三年，除仙居丞，後知溧陽縣，專以誠意化民，民莫不敬。夏秋二稅，以期日榜縣門，鄉無吏迹，而輸送先他邑。辨因任歷四年，獄戶未嘗繫一重囚。隆興二年，金犯淮燠，人相驚曰：寇深入矣。官沿江者多送其孥，衡獨守浙右，移家入縣，民心大安。盜蝟起旁境，而溧陽靖晏自如。時汪澈轉運使，韓元吉等列上治狀，詔進一秩，尋詔入為監察御史，歷司封郎中、樞密院檢詳，出知溫、婺、台三州。惟婺嘗泄其治，加直祕閣，而衡引年乞身，懇懇不休。上累卻其奏，除祕閣脩撰致仕。上思其樸忠，旋召落致仕，除侍御史，以老固辭，不獲命。差同知貢舉，會外戚張說以節度使掌兵柄，衡力疏其事，謂不當以母后肺腑為人擇官。廷爭移時，改除起居郎。衡曰：與其進而負於君，孰若退而合於道。章五上，請老愈力。上知不可奪，仍以祕撰致仕。中莫濟，不書勅。翰林周必大不草

制石正言王希呂亦與衡相繼時去國士為四賢詩以紀之衡後  
定居崑山結茅別墅杖屨徜徉左右為二蒼頭聚書踰萬卷號曰樂菴卒  
年七十九衡自宣和間入辟雍同舍有趙孝孫者洛人也其父實師程頤  
家學有源勸衡讀論語曰學非記誦辭章之謂所以學聖賢也不可有絲  
毫偽實處方可以言學衡心佩其訓雖博通群書而以論語為根本臨沒  
沐浴冠櫛儵然而逝周必大聞之曰世謂潛心釋氏乃能達死生衡非逃  
儒入釋者而臨終超然如此殆幾孔門所謂聞道者歟論見沈作賓下蘇  
州府志衡歸崑山圓明墅墅日與門人講解經義娓娓無倦聚書踰萬卷  
名其室曰樂菴自號樂菴叟學者稱為樂菴先生淳熙五年卒年七十九  
衡宣和間入太學同舍生洛人趙孝孫勸衡熟讀論語且曰學非記誦詞  
章所以學聖賢耳不可有絲毫偽孝孫之父顏子實師程叔子衡心佩其  
訓故雖博涉群書而以論語為主本講學明道樂於教人自中年後絕欲  
清脩唯二蒼頭給事臨沒沐浴冠櫛作手書數十留別親舊仍戒其子使  
周急卹孤不得飯僧奉佛復問天色何時答以月明儵然而逝周必大聞  
之曰此身平生跌蕩到此乃得力可敬可羨又曰彥平非逃儒入釋者而  
臨終超然如此殆聞道乎所著書有易說論語說易義海撮要樂菴文集

總若干卷行於世。錄自本傳。揚州府志。李衡字彥平。勤學有局。幹登紹興十五年進士第。累遷監察御史。遇事敢言。無所顧忌。乾道中。出知婺州。召為司封員外郎。兼司勳郎中。出知台州。以循良著稱。帝嘉之。入為御史。樞密院檢詳謝事。除祕閣脩撰。致仕。起為御史。同知貢舉。榜中得士多英傑。時論稱其明允。遷起居郎。無何。復出守。後卒于家。子應祥。起宗。登進士第。玉峯志。李衡字彥平。本江都人。避地居崑山。登紹興進士第。為溧陽宰。以德化民。四年。無犯罪者。剡章交上。召對。陳便民十餘事。除知溫州。未行。擢監察御史。出知婺州。召拜司封郎中。遷檢詳。俄引年掛冠。築庵圓明村。自號樂菴。年餘落致仕。除侍御史。同知貢舉。因上疏論張說不當居樞。竟遷起居郎。不就。知台州。又不就。復上請老之章。時莊治作四賢詩。以美之。四賢者。周必大。莫濟。王希呂。及衡也。衡道學精明。且樂於教人。初自淮來。吳萬頃先祖實相從遊。同居崑山。授以莊子一卷。寓樂菴時。朝夕講說。和寒山拾得詩一冊。行書整整。皆達理悟性之語。蓋衡絕欲新修。自中年後。惟一蒼頭給事。故年幾八十。視聽不衰。而理性益明。一夕作手書數十紙。遍別親友。且戒其子。毋得隨俗作佛事。有樂菴語錄一集。行於世。和寒山拾得詩萬頃。今藏于家。子應祥起。

先生云。吾年未六十。已絕欲。一歲先妻王氏亡。諸子哀號。至不忍聽。吾意極亡。聊不能解。釋私自尤曰。學道四十年。今日憂患。反不能挑遣。何耶。因讀楊子雲見善明。用心剛之語。乃大喜曰。苟用心不剛。不免為境所轉。然不礙我正見。吾今胸中固已了然。所恨者力未至耳。自是日夕窮究性命。死生之理。晚年亦覺有進。憂樂禍福。不復動心矣。先生年幾八十。神彩煥然。每對賓客。議論超偉。僕一見之。必曰。先生精神如此。福祿必未艾。先生曰。不然。吾根本稍固。精神自然發見如此。縱饒明日死。今日精神也。只如此。未遑前一日。其婢心諗之。喜曰。精神若是。亦何慮耶。先生笑曰。平生學道。正欲凝神以觀化耳。翌日捐館。先生每見貧困。不能為生者。則與之錢粟。又嘗持不殺戒曰。此非所以為仁也。但要熟一念耳。先生每見有精於藝術者。則慨然曰。無乃謬用其心。苟移此心而學道。何所不至。先生所至。受徒教人。無他術。但以論語朝夕討究。能參其一言一句者。莫不有得。或曰。李先生教學。且三十年。只是一部論語。先生聞之曰。此真知我者。太宗欲相趙普。或譖之曰。普山東學究。惟能讀論語耳。太宗疑之。以告普。普曰。臣實不知書。但能讀論語。佐藝祖定天下。才用得半部。尚有一半。可以輔陛下。太宗釋然。宰相之。又有一前輩。平生蓄一異書。雖子弟不得見。

及其終。發篋以視。乃論語一部。此書誠不可不讀。既讀之。又須行之。先生自幼講明道學。中辛以後。絕欲清脩。惟二蒼頭侍側。奉養極淡薄。居南宋未久。以言不得用。掛其冠而歸於崑山南六里。架屋數間。種二畝。號樂菴。時往來其間。日取六經論語孟子讀之。朝暮不少愆。嘗語人曰。吾讀後世書耳。每坐則焚香酌茗。與諸子及門弟談道德性命之學。衮衮不休。聚書萬卷。圖畫滿室。每閱以寓意而已。家事悉付之子弟。不復關心。父子相視如師友。每言吾投老得官身。歷清要。竭來此邦。且四十年。有田可耕。有廬可居。年垂八十。幸無疾疢。分已過矣。即死無憾。淳熙戊戌。夏微覺不喜食。即權扁舟。往樂菴。一榻條然。絕無人聲。時諸弟視旁。先生與之言曰。脩竹滿前。對此待盡。有何不可。每旦入問。安否。先生曰。吾略無所苦。遂舉兩臂示之。曰。浸假而化。予之左臂。以為鷄子。因以求鷄炙。吾亦待觀化。一巡時。女兒亦來。問疾。先生曰。某將死。老姊無庸憂人之死。生如晝夜。生處便是死處。死處便是生處。若恁地理會得。又那得生死語。竟即取紙數十幅。為手簡。徧別親舊。又以錢米分惠貧者。無一遺忘。已而作遺訓。示諸子曰。吾寓形宇內七十九年。蚤雖困於百罹。晚僅全於五福。死期既至。勢不復留。雖一念不生。本無去來。而四

歸腐敗。瞑目以後。當付囑者。今具



畫一詞宗輩各仰遵守。此。因循不曾辦得直掇慢試圖之  
以小為貴僅能周身足矣其間不置一物雖冠裳亦無用其裁一摺藉背  
可也一汝祖父母安厝皆有棺無槨只以磚砌覆之石版足矣七七或百  
日內不須選日便埋埋了就家中供養一親識賄贈依例收留第經錢與  
折祭之類可文以上不可受一僧道禮數雖經疏亦不可受若欲靈前持  
誦則又大不可但以此示之一應干錢米支收文字在櫥櫃中今歲田產  
可便五分分撥以一分抄上周急簿逐年輪一兄弟掌管給施取吾簿上  
意旨刻石菴中令項椿管置厝收支如成娘之類歲撥數十十以作營運  
運之歲月何有不辦如此等孤遺皆當賑卹一吾既往之後歲時祭祀隨  
家豐儉由禮可也若齋一負僧念一聲佛非吾子孫此意是真報佛是供  
養上士聞之當不復疑中下驚怪非所恤也右六事皆吾治命不得違戾  
吾平生性命道德之學治亂安危之策不獨載之空言亦粗見之行事今  
既永訣竄客緘默戲說傷曰竿木隨身得自由應緣已畢復何求儵然來  
往等孤鴈影落寒潭迹不留書訖且語諸子曰吾本欲便往為天氣不爽  
姑少留以俟君上汝輩候吾死即歛歛已方便家人知不欲死婦人手也  
切不可用庸巫課陰陽諸子聞其言遂微泣先生曰吾死汝輩何憾焉用

哭平生與爾說箇甚麼諸子應之曰死生之理固自曉然但父子天屬屬情不能自遏先生曰若是為父子後哭饒爾三十拄杖及夜沐浴遂冠櫛起坐精神自若了無大伸意至二鼓倏然而逝時六月二十三日也諸子恐怛化不敢遽哭家人歎歎絕未有至者惟諸子及二蒼頭在旁是夕風月清美如陽春高秋天宇湛然萬籟沉寂不類人境識者知先生之逝決非與萬物同盡者先是嘗語監征王琛曰吾何漏子已有頃放處矣豈非先知者耶先生平日劇談道學每語諸公看我臘月三十日好好做箇散場聞者憮然至是乃相與歎服右先祖左史祕撰李公語錄昔刊于家塾自後諸父淪亡散失不全近雖登載典刑錄行於世但略而未詳潛再從補緝鉅梓以廣其傳

# 李彥穎

宋史列傳李彥穎字秀叔湖州德清人少端重強記覽金

能超支徑亂流獲濟紹興十八年擢進士第主餘杭簿守漕泳豪效酒家業為官監利其貲具彥穎爭之泳怒戒吏鍛鍊不得毫髮罪調建德丞改秩時宰知其才將處之學官或勸使一見彥穎耻自獻調富陽丞御史周操薦為御史臺主簿金敗盟

翰周操不以為然。右正言尹樞政薦引同己者，轉言和於上前。上惑之，罷督府。良翰操相繼黜，而樞進殿中，遷諫議大夫。一樞以和戰守，扣彥穎。彥穎曰：「人所見固不同。」公既以和議為是，曷不明陳於上前，以身任之事，成功歸於公，不成奉身而退，若欲享其利而不及其害，國事將誰倚？樞大怒曰：「自為諫官前後百餘奏，曷嘗及一和字，而臺簿有是言，自是銜彥穎陰排之。」改國子博士，權吏部郎中。以父喪去，免喪復為吏部兼皇子恭王府直講，權右史兼兵部侍郎。經筵張栻講，葛覃言先王正家之道，因及時事語激切，上意不懌。彥穎曰：「人臣事君，豈不能阿諛取容，栻所以敢直言，正為聖明在上，得盡愛君之誠耳。」書曰：「有言逆于汝心，必求諸道。」上意遽解，曰：「使臣下皆若此，人主應無過矣。」立皇太子兼左諭德，首論建置官僚，以為詹事於東宮，內外無所不當省事。湏白詹事而後行。司馬光論皇太子講讀官，有秦疏錄以進，上大喜行之。皇太子尹臨安兼判官兼中書舍人張說再登樞筦，彥穎論說無寸長。去年驟躋省府，物議沸騰，今此命復出，中外駭然。在恐六軍解體，人心不服。未幾權禮部侍郎兼侍講，因言士習委靡，不然則繳激，宜擇篤實鯁亮者用之。升詹事，見上言皇太子尹臨安已久，雖欲更嘗民事，然非便宜，一意講學，他日以言於上者告。

太子趣草奏辭尹事三辭乃免兼吏部侍郎權尚書兼侍讀月食淫雨言  
甲申歲以淫雨求言今十年矣中間非無水旱而不聞求言之詔豈以言  
多沽激厭之耶比欺蔽成風侍從臺諫猶慎嘿况其他乎陰沴之興未必  
不由此時廷臣多以中批斥去彥穎又言臣下有過宜顯逐之使中外知  
獲罪之由以為戒今潛毀潛行斥命中出在廷莫測其故將恐陰邪得伸  
善類喪氣非盛世事也除吏部尚書接送金賀正使還言兩淮兵備城築  
及裁減接送浮費甚悉上嘉納焉十二月除端明殿學士簽書樞密院事  
二年閏九月參知政事金使至上遣王汧諭金使稍變受書舊禮議久不  
決彥穎曰須於國體無損而事可濟乃善若如去年張子顏之行不但無  
益時左司諫湯邦彥新進冀僥倖集事自許立節彥穎言邦彥輕脫必誤  
國體嘗對使殿上復語及之彥穎欲進說上色動宰相亟引退遂以邦彥為  
申議國信使且命福建造海船起兩淮民兵赴合肥訓練并詔諸軍飭戒  
備中外騷然彥穎復言兩淮州縣去合肥遠者千餘里近亦二三百里今  
民戶三丁起其二限三月而罷事未集民先失業矣上作色曰卿欲盡撤  
邊備邪彥穎曰今不得已令三百里內令家起一丁詣合肥三百里外就  
州縣訓習增給錢米限一月

而還。彥穎論其罪，貶新州。彥穎三歲，實攝相事，內降繳由甚多。內侍白劄，藉名造器械，并搗師降首。發左藏封樁，諸庫錢動億萬計。彥穎疏歲中經費以進，因言：「虞允文建此庫以備邊，故曰封樁。陛下有意恢復，苟用之不節，徒啓他日妄費，夫封樁初意上瞿然曰：『卿言是朕夫之矣。』自是絕不支墜。馬在告，力求去，以資政殿學士知紹興府。勤約有惠政，提舉洞霄宮。復叅知政事，病羸，艱拜起，力辭。上曰：『老者不以筋力為禮。』蓋享禮繁，特免卿諫官。論其子毆人至死，奉祠。錫秩起知婺州，禁民屠牛，指屬縣稅十三萬三千緡。後知紹興府，進資政殿大學士，再奉祠。進觀文殿學士。紹興元年，致仕。家居凡十載，自奉淡約，食纔米數合，室無姬媵。蕭然，永日與州縣了不相聞。薨年八十一，贈少保，謚忠文。子沐，慶元中與一時臺諫排趙汝愚，善類一空。公論醜之。宋周益公大全集李秀叔叅政書：『某伏承公劄諭及鄭康孫事，謹悉上。既覽奏，即令改充閩中路銓。此關弄印頗久，今茲親擢，蓋重崇正之薦也。下政劉堯卿雖將家，未知能稱職否。向蒙諭及，蠲免舊次三省尋裁減萬餘緡，自有堂帖，所以不敢別具復併。允鈞紹又某竊以孟春之月，風作峭寒，共惟某官綠野雍容，人神交相。鈞候動止萬福，某尸素無補。日切汗顏，侍拜悠邈，更深傾仰。仰祈妙畜真粹，以

對趣召。某久違英矩。懷思不忘。曲荷謙光。時賜書教。每一展讀。輒慙快。彌日不能自己。蓋道德之隆。詞翰之盛。有以服小人之心者如此。非勉強而然也。某忝審以大學士之稱。榮使珍館。輔臣異數。近世空階。涓日而拜。綵綸。搢紳莫不欣服。尚稽馳慶。首辱華緘。感悚交深。尺紙莫究。萬一尚乞鈞照。某密贍行馬。無由往奉杖履。遙想功成。名遂燕處。晏然起居。惟適之安。丕享無窮之樂。回視某輩。強心為智。憂讒畏譏。惴惴度日者。其勞逸蓋相萬也。因書自致。不覺怛怛。祭李秀叔叅政文。嗚呼。惟公學富百家。才高一世。躬蘊賢德。仕逢盛際。禁路政途。獻納都俞。垂相而去。掛冠自娛。諸郎鼎貴。宸眷狎至。十年家居。五福具備。憶在辛卯。公郎銓曹。間嘗告予。夜夢怛怛。有客至門。云叅大政。名光氏李。驟與我競。徑主我席。反謂我賓。交爭而寤。非想非因。予笑謂公。公豈恭發。曾幾何時。果與夢合。不寧仕宦有子而賢。俱登甲科。問譽相先。年踰八十。壽復一揆。公逸彼勞。時不同耳。推舊執政。再來率遷。公還中書。予忝差肩。西樞闕。長嘗密公遜上。非無意。公則有命。今公永歸。老病不文。遥寄真觴。畧叙平生。

李繫

宋史列傳。李繫字清叔。崇慶晉原人。第進士。為隆州判官。攝綿州。歲侵。出義倉穀。以錢代下戶。又聽民以茅秸易米。

作粥及楮衣親衣食之活十  
獨按堵知永康軍移利州提點成都路刑獄兼提舉常平歲凶先事發廩  
蠲租所活百七十萬人知興元府安撫利州東路漢中久饑劔外和糴在  
州者獨多繫嘗匹馬行阡陌問訪求民瘼有老嫗進曰民所以飢者和糴  
病之也泣數行下繫感其言奏免之民大悅行倉部員外郎總領四川財  
賦軍馬錢糧升郎中淳熙三年廷臣上言四川歲糴軍糧名為和糴實科  
糴也詔制置使范成大同繫相度以聞繫奏諸州歲糴六十萬石若從官  
糴歲約百萬緡如於經費之中斟酌損益變科糴為官糴貴賤賤時不使  
虧毫忽之價出納眡量勿務取圭撮之贏則軍不乏與民不加賦乃盡利  
民十一事上之前後凡三年繫上奏疏者十有三而天子降詔難問者凡  
八訖如其議民既樂與官為市遠邇謹趨軍餉坐給而田里免科糴始知  
有生之樂會歲大稔米價頓賤父老以為三十年所無梁洋間繪繫像祠  
之范成大釋䟽言關外麥熟倍於常年實由罷糴民力稍紓得以盡於農  
畝孝宗覽之曰免和糴一年田間和氣若此乃知民力不可重困也擢繫  
守太府少卿范成大召見孝宗首問糴事可久行否成大奏李繫以身任  
此事臣以身保李繫孝宗大悅曰是大不可待李繫也上意方嚮用而繫

亦欲秦蠲鹽酒和買之弊。以盡滌民害。會有疾卒。詔以繫能官致仕。恩外特與遺表。澤一人庶官。前此所未有。初繫宰眉山。校成都漕試。憇吳氏世襲兵柄。必稔蜀亂發策云。久假人以兵柄。未有不為患者。以武宣之明。不能銷大臣握兵之禍。故憲武之烈。不能收藩鎮握兵之權。危劉氏殲唐室。鮮不由此。吳挺以為怨。後繫總餉事。挺繆奏軍食狃惡。孝宗以問繫。繫緘其牒以進。挺之妄遂窮踰三十年。吳曦竟以蜀叛。安丙既誅曦。每語人云。吾等焦頭爛額耳。孰如李公先見者乎。繫講學臨政。皆有源委。所著書十八種。有桃溪集一百卷。論曰。余端禮平時論議。剴正及為相。受制於韓侂胄。雖有志扶掖善類。而不得以直遂。頗不免君子之論。若李壁丘室皆諫侂胄。以輕兵召釁之失。及其決意用師。命葉適草詔不從。而壁獨當筆馬。何其所見。後先對廷哉。附會之罪。壁固無以逭於公論矣。倪思直辭劄主。又屢觸權臣三黜。不變其風。槩有可尚焉。李繫所至。能舉荒政。觸苛賦。亦庶幾古所謂惠人也。元一統志。李繫字清叔。宋淳熙中為四川總領。舊制軍糧六十萬。以等第均科。名曰和糴。空實強取已五十餘年。民甚苦之。淳熙四年。繫欲官自為糴。增糴本錢百餘萬緡。通融排幹。不傷經費。而用度足。黃裳作罷糴行。以誌空事。

云淳熙四年李繫奏罷之官自置



場不驅催。不取贏。民自槩量。夫大府卿四川總領財賦。累贈通奉大夫李公墓誌。自中興多故。師不解甲者十有四年。指權宜一切之征。為經常不易之費。百年間士大夫由之。不知視為當然知之矣。又從而旁緣吮剝。詭取陰奪者。此皆無以議為。或知恤之。莫知所以救者。什嘗四五。知救之而不能慮。終知救。不永厥德。什亦二三。或母問弗克。惟既厥心。寬一分則有一分之益。此什不二焉。若夫受任之臣。以是心求之。憂民之君。以是心應之。未嘗有精神會聚之素。而問辨逆復。如父詔子承。友疑師誨。誠意實德。爛然簡冊。則信所謂千載一合。此合以天也。淳熙三年七月辛未。廷臣上疏曰。臣切見四川總領財賦所歲支軍糧。為石百五十有餘萬。營田租稅。與貿易利州諸處夏秋稅斛者。凡十九萬。其百三十萬。水運七十。和糴六十。量產之薄厚。而制其數。馬名曰和糴。實科糴也。上三等戶。饒於貨用。自輸自請。雖少損。猶可支下二等戶。勢必付之攬納之家。本錢既不可請。姑遣責可耳。請下總領所。蠲四五等所科之數。而官自收糴。或止增水運以補元數。詔范成大。同李繁。疾速相度聞奏。時范公制置四川。李公已被命總餉。尚留漢中也。李公奏謂今九州和糴。以二十四萬石。敷上三等戶。三十六萬石。敷下二等戶。若

官司自糴下戶之所糴者而加之水運則增費二百八十八萬緡此何從出俟臣到官詢究乃議施行願假數月之期永除五十年之病夫未知君之信否而慨然以是自任矣迨領餉事即上疏略曰六十萬石米若從官糴石增一千多至四千歲約百萬緡第總領所財賦已經宣撫使虞允文覈實歲入有常未易增費臣為陛下畢誠竭慮但於經費之中斟酌損益不須朝廷降度僧牒不用宣司椿積錢不動總所歲計自可變科糴為官糴貴賤視時不虧毫忽之價出納稅量不取圭撮之贏使軍不乏食民不加賦敢掇其大者十二條以獻一謂自古軍糧必隨地產今利閩興洋與關外四州米麥之產多寡不侔今當隨土之宜以充軍食二請州縣分掌糴本官侵欺移用者以三尺從事三請措置糴買官得自舉辟曰糴負四請依已出命免收頭子勘合錢五請通判知縣以糴買能否議賞罰六許民戶賣糧準納賦役七請聽臣不時委官往州縣盤量八請欲於上戶勸糴令民自量自槩自輸之倉以防多取之弊九請官糴斷可久行遇有調發或未免暫科事已而復敢先事而言十請仍舊以元價和買利路諸州稅斛十一請總領所與宣撫司平糶往來其職事諸司不得與願專責任以塞浮論詔以六條問公則

其詳度至是孝廟猶未以剽屬公

也。公奏此臣所總財計制司。知又畫一以聞。詔問未見比民間和糴有無增價。公奏天時有豐凶。物價有貴賤。隨宜損益。難以豫計。詔問若增本錢。約度幾何。歲於何處撥。公又奏不可豫計。且如閬州以高價糴商米而關外小價。科民糧裕此商而困彼農。行之三四十。年不知通變。臣今於關外隨宜收糴。比未視事已減本錢近十萬緡。而糴買通快利。閬州米價亦隨宜高下。使之適中。減省亦十餘萬。而米商源源不絕。每事如此。則歲幹百餘萬。為甚難。詔問不通水運。州軍無人販般去處。舍就甚處糴買。如何般運。公奏謂如關外四州。每歲共糴糧十三萬餘石。有水運及商販。則價直稍下。無運無販。則增陸費。今二十三倉已糴十八萬石矣。皆無般運之勞。詔問人戶自量自槩。自輸之倉。寧無欺弊。公奏雖未保無弊。與其官自量槩而肆其虐。取也。詔問以米麥隨宜雜支。及今民戶以稅役準納糧米。有無未便。公奏謂已移文范成大。見謂可行。時范公惑於浮言。謂公奏先上。則同共詳度之命。無可施行。公適露厓裏。以告于范。久之范亦舍然信服。連名復命。卒無以易公也。俄又詔四川和糴。且照年例施行。不得輕易更歛。正將其間故事革去。別聽朝廷指揮。至是則孝廟之疑猶未釋也。公又再請朝廷不能奪。詔淳熙四年分權免一年。明年再請。又詔

免一年。蓋廷臣始為下二等請。而公併蠲五等。至六十萬石。且始言費二百餘萬。暨領事。究實則費半之。故上下疑信。久而未決。時度支郎中周公嗣武被命。與公計度蜀賦。公請併付嗣武審覈。嗣武尋亦是公。獨謂遣官勸糴。及民賦準糧。適判知縣。以能否展減磨勘。是三者未便。詔又下公。公曰。大者已行。則小者姑可置。惟糴買官。請五得三。必固以請。上又從之。蓋自淳熙三年之秋。九月。迨五年三月。僅一年有半。而奏聞凡十有三上。尚書一與同列。往返七璽。封下尚書。可其奏八。訖如初議。克底成績。嗚呼。其難哉。習坎有孚。維心亨。彖釋之曰。維心亨。以剛中也。以孝廟之聖。主於上。范公之賢。議於下。猶以浮言異論。始疑終信。非公剛實在其中。庶能行尚而往功乎。民既樂與。官為市。牛車擔負。千里不絕。會歲大稔。父老以為三十年米價。不若是之賤。梁洋間。繪象祠公。飲食必祝。縉紳大夫士。采民謠以獻。無慮數百篇。而資政殿學士黃公裳所賦。漢中行。罷糴行二章。尤為卓絕。四年五月丙午。宰執進呈范成大奏。關外麥熟。倍於常年。蓋由去歲罷糴一年。民力稍紓。得以從事耕作。上曰。免和糴一年。民間便已如此。乃知民力不可以重困也。王淮等奏云。去歲止免關外。今從孳繫之請。盡免和糴。為惠尤廣。乃自會。及范公召還。上首問可保其

其後如鹽如酒及和買布。公方欲次。弟奏。蠲以盡除民害。繫上大悅曰。是大不可得。李繫也。

卒。詔謂措置和糴。能寬民力。特與表恩澤一人。洪惟孝宗皇帝在位二十八年。動遵憲法。裁抑恩賞。上自中官。以及妃嬪。戚里宗室。內侍潛邸。雖親昵當得之恩。皆從減損。至於遺表恩澤之法。雖寺監長貳。亦復削去。今於公乃無所吝。若此。某生未及月而公卒。及長。從父兄習。聞公行治。又與父兄皆獲交于公之子璟瑀。嘗以公罷糴本末。伴識篇端。未幾。又以書來曰。先大人之葬。既五十年而未之銘。雖墓之有銘。非古也。而舍是無以久其傳。子為我書之。按狀則仁言善政。有不可勝紀。而大要則誠求故中。剛中故事。乃撮其要者而誌之曰。公字清叔。系出趙郡。趙郡始於秦司徒曇曇生璣。璣生牧。牧相趙。因家焉。牧之孫曰左車。左車之曾孫曰秉。徙潁州。秉之六世孫就。徙汝夏。秉之七世孫頡。徙南鄭。頡生郤。郤生固。皆漢三公。繇是李氏為蜀望。曾大父平。大父講。贈承事郎。父馭。以公陞朝。贈朝奉郎。母金氏。贈太宜人。承事生二子。朝奉為次。蚤有志節。嘗游秦客大梁。浮淮泗江浙。道荆楚。所交皆一時名流。晚益貧。公未冠。以詞賦再舉于鄉。尋以春秋首選。擢紹興十八年進士第。授左迪功郎。邛州安仁縣主簿。石泉軍

教授用薦者改左宣教郎。可母憂服除。知眉山縣。簽書隆州軍事判官。轉運司。檄兼權通判彭州。制置司。檄兼權綿州及解州事。會通判闕。攝事。改攝通判邛州。權發遣永康軍。利州。成都府。路提點刑獄。差充四川類省試院考試官。權本路轉運司事。權主管四川茶馬。知興元府。主管利州東路安撫司公事。除倉部員外郎。總領四川財賦。軍馬錢糧。陞郎中。除太府少卿。遷卿。未受命。致其仕。積官至朝奉大夫。以長子璟陞朝。贈朝請大夫。以仲子瑀累贈至通議大夫。始仕安仁。會朝廷行經界法。命鄭克使蜀。公受檄行視諸邑。區劃平允。人已覘公器識。石泉學校不葺。公白郡廣贍養之田。請于朝。增薦送之。目眉山號不易治。曰此不可以力操也。其為科條能使百姓知孝悌忠信。故自愛重而耻犯法。州承虛額而取之。縣縣無從出州。以常賦愆期。告于制置司。皆毋敢自白。公力陳虛額之弊。帥府是不復詰。又嘗奏記制置使汪公應辰。其畧曰。今劔北諸州千里蕭然。久而不恤。必為盜賊。往年有納粟度僧。與夫田契等錢。詔別貯于餉所。不下數千萬。今捐其什二三。凡調夫之地。皆除稅一年。數州之民庶。其少瘳乎。四路故輸絹于利沔。大安諸郡。凡費六千。而關外諸軍得絹。僅需半直。公白制置使。盡令民各輸正色。古

而過五千。而給軍亦如之。軍民必

謂兩便時頭子勘合錢皆增于諸司大畧謂頭子錢昔者貫取五錢其後累贈至四十三近又創增十三勘合錢昔者一錢及石貫匹兩取三十錢近又貫取二十今以萬緡為率分為千鈔頭子加百三十緡勘合加二百緡西蜀之廣一歲之中錢之出入不知其幾也以萬緡計之每一出入輒取三百三十緡四川錢物共以五千萬緡計則是二者當得百六十五萬矣朝廷勤卹民隱下有司除去虛額以三百萬緡對減除放詔令數下丁寧懇惻二年于茲有司商確僅有成議夫以三百萬緡分為數年對減虛額是每年所放不滿百萬其艱澀如是議者乃復設術陰取元年添頭子二年添勘合一歲之中比所減虛額之數不知幾倍而人莫之悟為此說者盜臣之不如也公不惟職思其憂蓋以斯民休戚自任於此數事亦可畧見樞通判彭州纔閱月償宿逋五萬緡有奇彭之民既輸米于州石五千又移輸威茂州石不下十二三千乾道二年總餉者優處移四千九百餘石以餉綿州之屯石亦十千公言之制置使謂彭民安能勝此三役繇是期會稍寬暨公總蜀賦乃為奏請蠲左綿之輸公在綿會歲侵請于諸司輸放振卹諸司不能奪聽免四五等戶而期會滋急公謂常平免役今義倉穀專充賑給不得他用遇災傷給散行訖聞奏公乃如今

減價出糶。以償錢貸下。仍代輸秋稅。庶勿誤膳軍。具奏且行。又聽民以  
茅秸易米備糶。溢楮衣親。衣食之所活十萬人。時總領所猶取糶於綿。公  
力陳不可。又為畫補糶之策。餉使行之。米價頓平。議者始以好名譏之。迨  
明年歲在戊子。邛蜀彭漢及成都間。盜賊蠡起。而綿獨樓堵。然後知公之  
見遠矣。邛亂未弭。宣撫司令誥盜。故公謂始於諸縣。租稅趣辦。大額。初以  
八十萬緡為額。其後至起九十七八萬。故民窮盜起。不謀同時。議者舉過  
發廩勸分。然義倉二萬餘石。為軍儲之外。僅六十餘戶。六縣之口。二十萬  
計。其何以給之。况民產業薄。雖勸分貸種。所出無幾。此必上司於糶本實  
額內。除十四五萬。以免借稅之害。於折估實額內。除六七萬。以免那錢之  
害。則百姓樂生。雖驅之不為盜。又論邛之患三。一曰。州所欠總領所十萬  
緡。蹙新以償舊。其患無窮。二曰。豫借民稅。多至十萬。三曰。今歲終尚負十  
餘萬。則八十萬之額。且不能赴。此非假以數萬。而責其後償不可也。凡皆  
利病之至切者。邛之蒲江鹽井。歲欠百三十餘萬。往者都轉運司。權之以  
制低昂。課有定入。民不知也。自郡守增歲課。歸井于州。以資少府私用。而  
民始病。公併請于宣撫司。更法平質。亦省刑息。盜之一端也。厥後公總蜀  
賦。遣官覈其事。日輸不過六十斤。價十有四千。凡減鹽十萬



八千餘斤。為緡錢七萬。與隆簡無異。總所自權州。不與馬

公之勇於為善類此。永康之民。出入蠶崖關者。有征。公為之弛禁。三百萬

錢。而小家負課者。又蠲萬八千緡。有計兩縣力役之征。北旁近郡。為夥。公

又斥郡帑之餘。為代民輸凡五萬緡。會威州蕃部寇邊。公遣戍增餉。凡半

載。而民不知役。制置晁公上其勞。詔遷左承議郎。宣撫使。叅政王公上其

最。詔又遷左朝散郎。乾道末。歲凶。民飢。公以刑獄使者。領常平。先事發廩。

又下令蠲主客戶稅。租谷十之三。所活至百七十萬人。沉黎青菴吐蕃首

領奴兒結等。鈔邊數百里。創殘。公廢九折坂。戶諭而人撫之。貸米粟千五

百石。有奇。耕牛犁鋤之屬。萬四千有奇。丞相葉公某嘗欲以權酤鬻之。民

公謂請毋以他。以成都言之。日鬻酒二千緡。歲七十餘萬計。三年抵產。必

二百十萬。其誰能辦此。曩歲聽民請。買一道之廣。僅有縣鎮六十餘。所應

令。而繇此蕩產亡身者。十五六。此與東南酒坊不可槩論也。萬戶酒之說

則習俗各異。如成都中縣。歲為酒息八千三萬緡。若敷在民間。其為害甚

於官權也。職者韙之。公攝茶馬司日。詔吳挺提舉買馬。且俾歲市七百疋。

公奏使歲七百疋止。須爭先拔尤。有坊茶馬司歲額。况旁緣增多。不止是

耶。請為管總提所買。數發往興州。奏三上不報。又條奏七害。大畧謂乾

耶。請為管總提所買。數發往興州。奏三上不報。又條奏七害。大畧謂乾

道三年以前。吳璘以買馬奪御前三衙歲額。故提舉茶馬官績感張德遠。皆以罪罷。虞允文為之禁止。而後軍實僅足。今而命挺。其弊復見。况兩司競買馬。直必增。驕羗夷內耗國用。又諸軍青草錢。乃馬軍資以自贍。十年間。託買馬以拘收。而實奪之。雖有旨給還。久未施行也。三邊各有乘屯。而興州一軍。獨聽買馬。使皆援此為詞。從之與。抑拒之與。諸軍必並緣私販。宣撫司必禁此。此必闕二司之隙。况璘護送鬻馬蕃客。以防抄掠。卒挺乃抽索吏人。須知此必各有行移。互相牽制。臣反覆思。惟無一而可。是時吳氏雍兵無世。公亦欲假是分探之權。非但為馬政請也。漢中久旱。公蚤夜孜孜。凡以請禱矜恤者。靡微不盡。是時劔外九州和糴。興元為多。又以馬運所繇。芻秣不貲。公嘗匹馬行阡陌間。密訪民病。有媪進而言曰。民所以飢和糴之病也。泣數行下。公益加感歎。乃奏夏料宣司糧。皆糴而秋料宣司糧。大軍糧。以災傷關總領所。或放免。或停糴。糴既不及。民大悅。公於是已有意於九州能糴之請矣。綿州之屯。歲於彭漢綿石泉省計。截糴二萬餘石。而彭之勞費倍之。且綿之米價石五千。而遠輸者。反不下十餘千。公請差官就綿糴買。以寬民力。范成大嘗奏興洋等州義士。并金州保勝軍。關外四州忠勇軍。皆與

異名。蓋陝西弓箭手法。非調發不

得差使。今興元府都統司欲

利州東路安撫司欲以義士把

關。非法也。已徵陝西舊制脩成專法。詔從其請。公奏謂成西和皆要邊而

文州諸羗反側未定。今既難以烏合禁軍差替鄉兵。都統司又不肯差屯  
駐軍。今守關看烽義士忠勇軍。又礙近旨。如此則拘違法之徵文成撤備

之大禍。又關外忠勇軍并弓箭手等。給地免稅之人。與興洋義士不同。始  
因宣撫使張俊吳玠等。措置馬步軍二千餘人。已經數十年。軍額見存。如

一家三丁。一丁為軍。二丁為農。或耕或戰。各不相妨。諸軍自備甲馬。各有  
部曲。並如正軍。自乾道以後。宣撫司始令依義士專法。然猶在砦屯駐。在

州教閱。或一月一替。或半月一替。未至全年放散。今制置司僅於農隙教  
閱。五十日。夫五十年訓練之卒。而一朝縱之。經年不教。則事藝遺墮。與義

士無異。此臣之所甚惜也。以臣愚見。興洋等州義士并金州保勝軍。未嘗  
差使。自當依制置司所刊專法施行。而四州忠勇軍弓箭手。及興利義士。

文州忠勝軍。守關看烽。番上教閱。請仍依久例。惟申嚴私役之禁。可事。公  
之不為苟同。又類此。而於吳氏之專橫尤切切致意焉。先是公宰眉山日。

較都轉運司進士。因策問極言。久假兵柄之患。忌者或持以示挺。挺蓋憤  
久矣。至是滋忿。暨令領餉事。挺繆奏謂軍食陳腐。龍劔米簾黑。孝廟內批。

凡并賜公公秦此土實不同也乃各緘樣進呈上大悅曰李繁曉了如此於是挺之妄窮矣未三十年而曦以蜀叛士益服公之先見公講學臨政皆探源尋流取法前古讀書有春秋至當集春秋機關春秋集解又採摭群書自春秋迄戰國時事比年月而紀之曰戰國新書又有通鑑漢唐詳節漢唐事類三國捷徑南北精華其為文則有騷壇武備有忘筌集有薤露碎珠有韓退之書墓式有經語提要其臨政有理財要術荒政錄榜示鼓舞集經總條畫臺備錄西憲雜記推收集山南雜記帥閫備錄總所財賦源流總司雜記奏免和糴錄自經史子集無不覃思研精晝抄夜誦自號桃溪先生文曰桃溪集一百卷今藏于家公歷仕三十年所交皆當世名人傑士而平生受知如葉公某汪公應辰晁公公遡公武王公炎王公之望查公喬宋公似孫范公仲愷薦進人材如宋公若水楊公大全李公舜臣楊公甲韓公炳黃公裳范公孫馬公覺呂公商隱張公子震王公咨費公士燧其後各有以自見于時類省試主文所得進士如費公士寅安公丙劉公甲陳公咸李公興宗游公仲鴻自餘不可悉數公事母大宜人以孝謹稱母得風痺之疾扶侍者八載侵膚公以身嘗之而志真苦至於兄弟患難相救有無相通無

兄江西刑獄使者芝望臨一時講

論賡酬第凡自為知已公事  
 文老皆早卒際用薦者改宣教郎  
 人以仲子陞朝贈碩人四子重祖  
 通直郎致仕瑀朝奉大夫知涪州  
 女一人適朝散大夫前知成州羅仲甲孫男四人寬民承直郎簽書資州  
 判官澤民將仕郎安民覺民孫安七人外孫男女五人年六十有一卒於  
 淳熙四年閏六月壬辰葬以六年二月甲子墓在晉原縣鵠鳴鄉思恩里  
 甲山之原銘曰天生斯民后王所司小大相維是保是師是心之存則善  
 推其所為民我知覺民誰弱飢斯須弗存秦越瘠肥舍是非之公推利害  
 之私匪盡於浮議則沮於不見知烈烈李公惟義是比之死靡移上乎若  
 心內格衆允外銷群疑嗚呼誠可以  
 動天地貫金石矧一氣而同體者乎

永樂大典卷之一萬四百二十二